

鏡像密語

作者: 凱蒂貓女友

Powered by [紙言](#)

第一章、新的一天，新的工作

「今日早啲訓，聽日返新工，唔知聽日係點呢...」梁洛妍較好鬧鐘但一直都訓唔到。

「又係衰緊張，次次都係咁，一有新環境呢就緊張大師上身，緊張到失眠。」

「咁我啱啱大學畢業，話晒係人生第一份full-time工作嘛，緊張下適唔適應新環境、緊張下識唔識到新同事，是常識吧」洛妍終於係自言自語中淺淺進睡。

翌日九點鐘，梁洛妍準時到左新公司，主管東尼就同洛妍介紹黎緊佢會跟既上司——吖Sing。

「洛妍，你以後就係跟吖Sing，你既title係佢助手」東尼叫左吖Sing過黎指一指洛妍。

「Sing哥，你好，我會努力跟你學野，希望幫到你啦」洛妍細細聲講完，Sing點頭微笑。

Sing同東尼講左一堆洛妍完全聽唔明既職務，呢一刻洛妍想quit了。

「講笑，窮吖！點quit？」

「洛妍唯有鼓勵自己「冇事既，萬事起頭難，我一定做到，easy啦文員仔姐，做多兩三日就記得晒嫁啦」

「喺，你excel用vlookup將佢地對照返，再check多次就ok嫁啦」sing耐心指導緊一張白紙

「嗯，我試試，係咪咁做？最後save個file嘛。」洛妍接手試下禁file

「冇錯，你學野真係好快，講一次就記得」sing對洛妍讚不絕口。

「嘻嘻我後生嘛？」洛妍用佻皮既口吻，逗得sing笑到見牙唔見眼。

叮——洛妍收到一條來自佢男朋友林唯楓既訊息：

「我胃痛。」

洛妍因為做緊野，所以冇即時覆。但過左一陣，又收到第二條：

「唉，你自從返左呢份工之後個人好似失聯咁，咁我要你黎做咩？」

洛妍同唯楓一齊左斷斷續續8年，大家曾經都互相遷就對方遷就得好辛苦，不過大家都係因為呢個拍拖時長而苦苦堅持。

「sorry，我做緊野嘛，你點丫？我唔係你身邊你可唔可以學下好好食飯，準時食飯？」洛妍過左一陣再覆。

「我冇胃口」

睇到呢到，洛妍心累了，因為以前返part-time既時候都係一放工就要去照顧唯楓，特別係返左呢份

工之後覺得更加劬，完全冇時間比自己休息。因為唯楓自小胃唔好，成日都會同洛妍講自己邊到邊到唔舒服，洛妍由一開始既擔心同關心都日漸消磨，變得厭煩。

因為唯楓中意比人照顧，以前唯楓好努力照顧4年前任性既洛妍，洛妍終於有日知道自己任性既錯之後想彌補唯楓，所以好努力做唯楓想要既人，做唯楓心目中想佢做既角色，例如為佢做家務、管接送等等。當然唯楓對洛妍都係真心，曾經佢地兩個都以為大家會好好地咁過，但可惜由洛妍返全職開始，兩人聚少離多，漸行漸遠。洛妍都唔想再覆啲咩，決定繼續專心工作。

如是者，sing教左洛妍兩三日，洛妍好快就上左手，比其他同事稱讚，洛妍都估唔到係到返工幾開心，因為啲同事對佢幾nice，雖然洛妍打算只係做兩三個月就算，因為洛妍預計左九月佢會有升學，所以佢不斷提醒自己，唔係係到投放太多感情，萬一有一日唔捨得走點算

「應該唔會既，唯楓一直都想我辭職，而我點會甘心比自己做死一世文員仔，不過我又好中意做埋晒呢啲又悶又重重複複唔洗對客既野。唉，都係到時先算啦」洛妍獨自苦惱中。

短短幾個星期sing同洛妍就熟左，可惜全公司都有邊幾個同事知道洛妍個真樣，因為洛妍冇一刻唔帶口罩，就算飲水食飯都係公司避開同事或者拎轉面。日子耐左，愈黎愈多同事好奇洛妍個真樣。

「好想睇下你咩樣」佢sing終於忍唔到問洛妍。

「真係咁想知？」

「係丫，你太神秘，好有魅力」

「我覺得自己唔靚，唔想大家覺得我唔帶口罩落差好大，又唔想比人指指點點自己個樣咪一直帶口罩唉我都知避唔到好耐嫁啦，算了算了，比你睇一眼啦，咁我以後都可以同你食飯」洛妍講完輕輕拉開個口罩帶。

「唔係丫，幾好睇啫」佢sing笑了。

「多謝，認真比面，不過我包包面都係帶口罩靚啲，哈哈」洛妍面紅了幾分，講講下又帶返好口罩。

逐漸其他同事都開始開口問洛妍可唔可以除個口罩比佢地睇下，除左小部分既女工，好多人都係被拒而回。

其中一個有幸可以同洛妍熟左既女工佢恩都會為洛妍打圓場：「洛妍太靚啦，費時佢比你地睇蝕，唔好逼下佢啦哈哈」

「多謝恩姐，呼你知我對我個樣冇自信。」洛妍嘆氣

「你都傻既，你不知幾好睇，比啲自信啦」

「嗯我試下啦」洛妍講完都係帶返口罩，哈哈

短短幾星期洛妍同其他同事開始都相處融洽，特別係sing同洛妍熟左好多，食飯不時會教洛妍股票，洛妍又會分享下以前讀書既事。記得有次洛妍終於有勇氣睇返就畢業前一個學期既成績表，因為有一科成績未如洛妍理想，洛妍係公司諗起呢件事就喊左出黎，因為大家都知洛妍一直係一個好勤力既女

仔。

Sing一時喊知點安慰佢好，就輕輕摸左洛妍個頭一下，但洛妍已經好感動，不過洛妍知自己對sing係好似對哥哥咁，始終sing大過洛妍好多

但因為呢一下既舉動令公司好多同事都傳洛妍同sing有野，但只有洛妍冇呢個覺悟。

「係啫，我地下個月公司搬鋪，記得返新地址」sing突然同洛妍提起。

「哦，小事啦，轉個新地址姐」

「但你過去係做新同事啫」

「下，咁大鑊，你知我社恐，如果唔係你一開始撩我講野先，我打算摺到2046嫁」洛妍嚇到面青

「個到本來已經有一批你未見過既舊同事既，社恐都唔係最怕既野，我話比你聽最怕係小圈子」

「我最怕怕了，可唔可以唔走」

「唔得丫，公司要求」sing搖搖頭。

「唉，我對慣左你地嫁嘛，突然要再認識新人，萬一唔啱嘴型，發生口角點算」

「所以叫你學我做人要圓滑啲囉」

「係係係，跟你學野」洛妍努力掩飾自己既不安同擔心，唯有暗求自己到新址工作可以順利。

(續)

第二章、再次成為新同事

話咁快就到搬鋪前一日，sing好貼心咁whatsapp左洛妍新址路線同埋交通建議。

「梁小姐，唔好蕩失路。」

「哈哈，你又知我第一日返工出左事？」洛妍忍唔住笑左出聲

「估到你啦，咁大懵」sing特登加多幾個emoji去取笑下洛妍。

「Anyway, thank you」

「我同個邊啲同事介紹過下你，大家都好期待見到你丫聽日」

「嘩，sing哥你同人地講左啲咩，唔好嚇我啫」

「冇丫，我同個邊講話最近我有個新既助手黎跟我，幾好樣嫁咁囉」

「嘩你又做我？sing哥你咁講大家都會好想睇我個樣嫁」洛妍又嚇到面青啦。

「有咩好怕姐，又唔係唔好睇」

「唉，你唔明嫁啦。」洛妍已經落床搵定後備口罩

翌日七點正，洛妍早左起身，特意紮左一個新髮型，著左件白色恤衫再加一條百褶裙，因為今日心情好所以著靚啲。（鬼係心情好，其實係想比新同事好印象咋）

八點二十分，洛妍成功搭錯lift，但好彩既係預早左時間出門，啱啱好八點半搵得返公司入口。洛妍一推開門，一大半既同事都係新面孔，洛妍社恐不安感來襲，心諗：sing哥係邊到？我好驚丫。

洛妍打卡既時候同事奇姐開口問：「你係咪sing哥既新助手？」

洛妍點點頭，介紹左自己。

「叫我奇姐得嫁啦，by the way你好瘦」

洛妍怕羞咁笑左一笑，突然洛妍轉左個頭就發現sing哥原來坐左係近門口既座位。

洛妍即刻飛奔埋去：「sing哥早晨，見熟人個心先會定啲。」

sing聽完都笑左一下：「都係，一陣我地會有briefing，你係到聽就ok。」

「知道。」

開始Briefing個一下，洛妍心不在焉，對眼周圍望左望右，希望面盲既自己可以快啲認得同事既樣（

嘩咁既大話都講得出，擺明係想睇下新址呢到有冇靚仔，噓我地看破不說破啦)

洛妍掃視左5分鐘結果失望而回，加上新同事們好似冇咩望洛妍個樣，心諗：係咪呢，我都話我唔好睇嫁啦，sing哥恩姐佢地一個二個都氹下我開心先咁讚我靚既，不過有開心一陣都好既，我係黎專心工作嫁嘛。但最起碼呢到後生仔都比舊址多，始終同後生仔共事會開心啲。

突然有一個黑影從門口掠過，吸引左洛妍目光，一望過去只係見到有個高高瘦瘦、白白淨淨，身穿黑色tee，帶眼鏡既男仔行過。

洛妍意識到佢係遲到左5分鐘既同事，心諗：做咩呢個男仔會遲到既，明明主管話左今日唔遲得嫁嘛。可惜我睇唔到佢正面呢，不過遠望佢都好似不錯，係咪全公司最靚？喂喂喂，梁洛妍醒醒丫，你聽緊briefing嫁！但感覺呢個男仔好似好cool咁。等等先，我要專心丫！

「終於捱到briefing完啦。咁sing哥我有咩要做丫今日？」

「哦，我地過左黎之後duties會有啲唔同嫁啦，例如我地唔洗再整excel file嫁啦，仲有呢」sing慢慢解釋。

洛妍失落到極，因為新環境又未習慣，依家工作內容又唔同晒，又再重新適應。但洛妍都有辦法，只可能頂硬上，因為眼下又好難搵過另一份工。

叮——洛妍拎起手機睇左一睇：

「今日返新址點丫？」唯楓問。

「還好，少少緊張吧。」

「夜晚出黎」

「嗯，食咩？」

「你揀」

(續)

第三章、他與她

放左工之後，洛妍揀左一間唯楓中意食既西餐廳。

「今日sing哥笑我又差啲遲到，但我都唔想嫁嘛，鬼叫啲lift咁亂咁多咩？」洛妍手舞足蹈咁表達。

「嗯」

「我今日見左一個新主管，我高過佢，哈哈」

「嗯」

「做咩丫，你又話想見我」洛妍問。

「唔係丫，就好似你之前講咁，你唔中意我成日同你呻我學校啲野咁，我咪都唔中意你同我講你公司既野。」

洛妍沉默左一陣：「但我地唔講呢啲，又有咩好講啲？」

「我地冇話題好耐啦。」

「」洛妍靜左5秒。

「算啦，唔好嘈啦。」

「嗯。」洛妍心諗：都係因為大家冇參與到係對方既生活先覺得有距離感姐，之前讀大學個時都已經係咁，以前怪佢同我唔夠同步，唔夠上進，依家到佢同我同步又上進啦又變左我要去做野，又再次唔同步。但唔通我呢一世都可以唔返全職咩，靜係陪你咩，又唔得丫嘛。

成餐飯最後變左洛妍望住唯楓覆同學既whatsapp，唯楓望住洛妍悶悶不樂咁食埋佢份甜品。自從個次之後兩個人都冇咩再點聯絡。

洛妍唔多唔少都感受到兩人既隔膜，但逐漸都習慣左冇左唯楓既日子，因為洛妍每日除左返工之外，放假既日子都寧願約同事sing哥恩姐出去挽。直至有次sing哥恩姐約左洛妍去酒吧飲酒。

三個人不斷挽酒game，洛妍就不斷輸。sing哥同恩姐都睇唔過眼。

「我話左唔準讓、唔準幫我頂」洛妍捧住酒杯半哭腔大叫。

「你停啦好唔好，乖啦」恩姐開始搶洛妍既酒杯。

「我想醉，你做咩唔比我醉？」

「我口渴咋」

「但我唔開心啲，清醒好痛苦。」

「得得得，依家輸左唔準飲酒，食檯面既零食，以免你飲晒我地啲酒」

「」突然洛妍兩行熱淚係面頰擦過，因為佢諗起以前有人好擔心佢飲酒，會打黎叫佢唔好飲，會打黎話接佢返屋企。

洛妍知道今次同同事飲酒或者平時出去玩樂都係因為想逃避下，唔想同唯楓嘈。如今大家都好似厭煩對方咁，但洛妍流淚都係因為不捨咁多年既感情，始終自己都投放過時間落去。

仲有另一個原因係洛妍諗返起前幾日放工既時候，佢主動打返比唯楓問做咩唔覆自己短訊。

「你做咩唔覆我既」洛妍問。

「你仲搵我做咩？你唔係同你啲同事挽得好開心咩？」

「我地唔係未講分手嫁咩？」

「係冇講，但我地都大半個月左右冇聯絡啦，你仲咁大條道理既？」

「咁我我唔認分手得唔得」

「唔得，依家到我認我係呷醋，呷你同你啲同事，因為你冇左我都得嫁啦依家，咁仲搵我做咩？我講左幾多次叫你辭職，你明知返工就會失去我，你依家揀工作丫嘛，仲有面目搵我？」

「」洛妍無言以對，淪為一個鐘既炮灰。

「洛妍夠啦夠啦，飲夠啦你，我地返屋企啦。」恩姐叫醒左沉思緊既洛妍，三個人結果一齊搭的士返屋企。

(續)

第四章、好奇心爆發？

繼續扮冇事返工係洛妍既強項，有啲人耐左唔聯絡，習慣咪成自然囉。加上以前佢地兩個成日都嘈交嫁啦，話斷聯就斷聯簡直piece of cake，只係好似身邊少左個人，空左個位咁姐，但洛妍反而有少少鬆左一口氣既感覺，因為唯楓大部分時候都痴身，所以洛妍有時嘈完反而享受自由既感覺，唔洗比人管著咩衫，唔洗比人管同邊個同事傾計會唔會令佢呷醋，自由自在。

如是者，洛妍繼續日復日咁專心工作。直至係新址既第二星期，終於都有新同事主動同洛妍傾計。

「喂，你好丫，你就係傳說中既新同事呢？我叫吡輝」

「你好丫，我係洛妍。」

洛妍心諗：嘩，終於有人主動開口同我講野啦，感動到之前一直見你地班後生仔圍威喂，我都想埋堆丫

企係丫輝隔離仲有一個同事，係帶眼鏡既kai，一問之下原來kai係洛妍既師弟，佢地係同一間中學讀過書，但二人都素未謀面，不過洛妍已經覺得呢個身份拉近左自己同佢地既距離。

傾多兩傾發覺大家都係幾夾嘴型。突然之間，洛妍餘眼望到又有個黑影行過，唔係，係跑過先啱！

洛妍沉默左半秒，心諗：佢咪就係我返新址見到個個男仔？做咩跑過？佢唔係同輝爺、kai好friend嫁咩，做咩唔過嚟打聲招呼？唔通佢唔想識我？

洛妍打破沉默：「個個男仔？」

輝爺：「哦，佢叫吡言，佢好怕醜嫁，我估佢唔敢走過嚟同我地傾計，唔洗放係心到。」

「係咩？唔似嗰，佢好似好cool咁。」正當洛妍有啲失落之際，佢望一望左手既手錶，發現夠鐘放工。

「同你地傾計好開心丫，聽日再傾過喔！我依家放工先啦你地OT加油！」洛妍有少少不捨咁同佢地兩個揮手，轉頭就拎手袋走人。

「啊原來佢叫吡言。喂，我個腦點解會諗起佢既？」洛妍不思不得其解：「算啦，一定係因為我都好奇佢點解唔好奇我，而唔係我單方面好奇佢」（咪繼續幫自己搵藉口囉梁洛妍）

不過好快洛妍就冇左件事，因為洛妍知道識人講緣份，即係自己想識人姐，人地未必想識自己嫁嘛。

翌日洛妍如常返工，直到輝爺主動行近洛妍個工作檯附近：「喂，你日日同sing食lunch悶唔悶，厭唔厭嫁？」

「梗係厭啦，但你地又唔約我」洛妍差啲落淚（講笑）

「喂，掂，約你聽日同我地食，好唔好？」

「梗係好啦，不過有邊個，你知我未識晒你地班人」

「你想有邊個我就叫邊個！」輝爺拍晒心口咁款。

「我無所謂，你同kai一定要係到喔！」

「就咁話，聽日，不見不散！」

「嘩你講到咁搞笑，掂晒」洛妍又笑到見牙唔見眼咁，因為開心終於可以埋堆了！

「終於可以見到你個真樣啦！我準備好嫁啦」輝爺笑住講。

「哈哈冇錯，期待吧？等等，咁個個男仔呢？叫埋佢啦」洛妍雖然唔想比人見到個真樣，但又好想知道後生仔們會唔會覺得自己好睇，所以應約。

「你話咁言？我幫你問下佢囉」

「好丫好丫不過佢唔想見到我既話就算啦，我唔想好似逼佢咁。」洛妍瞬間又笠水。（唉係咁冇底氣嫁啦，鬼叫人地都一副唔想理自己既樣咁咩）

終於到當日放飯既時候，洛妍拎完銀包再拎轉頭望多一眼，發覺個個男仔都係冇黎到，失落左半秒，但冇再提起，因為洛妍清楚行動證明一切，心諗：人地唔黎姐係唔想黎啦，再問自己都冇癮

不過洛妍冇放係心到，繼續同輝爺佢地食飯傾計。就係咁洛妍逐漸埋堆，同佢地變得熟絡，開始隔三日唔埋兩日都會一齊約食lunch。

「咦，你同佢地相處得不錯，依家同佢地挽啦？」sing哥率先開口問洛妍。

「嗯，叫熟左又有野傾下咁啦！幾開心丫，終於唔係日日同你食lunch。不過」洛妍又沉默左。

「不過？」

「只係仲有一個同事未同我講過野」洛妍不禁失落。

「下，你黎左咁耐都未講？邊個丫？」

「唔話你知，不過唯一可以透露既係——我覺得佢幾靚仔。喂唔嚟住，做野先！」洛妍努力收返個花痴樣，換返個sad樣。

不過係工作期間，洛妍有一秒分心：唔知佢份人係點嫁呢？（又唔係唔知我中意好似義勇呢啲咁cool既男人，好奇下，人之常情姐）

「喂，BB，你同班後生仔識左好耐嫁？」洛妍放左工之後忍唔住問恩姐。

「我本身係你未黎個時已經識佢地啦，我以前都係新址呢邊返工既，後尾我調返去舊址姐。」

「哦，係呢，佢地成班係咪都單身嫁？」洛妍好奇心無處安放中

「啊，有兩個唔係單身嫁，一個係洋洋，另一個係咩言囉。」恩姐離遠指左一指比洛妍睇。

「哦」洛妍又失落mode左。

「做咩咁問既？」恩姐覺得好奇。

「冇丫，見佢地食飯都冇點提起有女朋友既？」洛妍心虛到呢（咁都比你兜到？）

恩姐笑左一笑：「咩言好怕醜嫁，從來唔會同人講起自己既野。」

可惜恩姐唔知既係——我同咩言仲係零交集、零交流、零溝通

（返返正題先）不過洛妍心諗：都正常既，好男仔係搶手啲嫁啦。誒？等等先，我又唔係想搵人拍拖，失落啲咩？我係黎努力工作賺錢既，唔係黎搞對象啲，只係同事姐咁好奇做咩啲？

（又會咁啱比你聽到係咩言有女朋友先失落既，你當洋洋死嫁？）

洛妍下一秒又說服返自己：「唔係，咁問清楚都好既，以免第時有傾到計既話令人地女朋友誤會就唔好啦！洋洋就另計啦，佢有人要都偷笑啦」

（洛妍咩洛妍，你有冇咁想同人傾計咩？）

「傻啦，咁做同事日對夜對都唔傾下笑下咁，邊有癮？面阻阻咁都好奇怪嫁嘛？有冇道理先？」

（係啦係啦，藉口達人同口是心非達人都係你啦，好彩恩姐聽唔到我既內心戲，哈哈）

（續）

第五章、論如何吸引他的注意

夜晚十點半，洛妍仲未訓得着，最終決定落一落床望下衣櫃，諗下聽日返工既穿搭。

「唔知佢中意睇（我著）啲咩呢？」

「唔知佢中唔中意動漫呢？」

「唔知我穿左呢套衫佢會唔會主動同我講野？」

「佢會唔會望多我兩眼？」

「鬼滅咁紅，無理由唔識既？」

「帶埋個鬼滅口罩都冇理由打開唔到話匣子既」

「但萬一衰左咁點丫？」

「冇野丫，衰左都至少係我諗好左聽日着咩唔洗煩多樣先啦。」

洛妍又開始自言自語啦

「唔理啦，就咁先啦，眼瞓到。」

如是者，洛妍著住GU鬼滅T恤，帶埋鬼滅口罩返工，短短五分鐘，就有幾個同事問起自己係咪中意動漫，洛妍果斷答係。

（終於有人問起，計劃通！）

日子耐左，身邊同事逐漸都覺得洛妍返工既穿搭都好有心思，每日唔同之餘，仲襯得出奇地好睇，有時又會用唔同髮夾整造型。

寶兒姐係其中一個好錫洛妍既女工，今日都特登過嚟拍洛妍膊頭：「洛妍，你幾特別嫁嗰，一時斯文風格、一時運動風格、一時休閒風格，日日返工搞到好似睇fashion show咁。人靚著咩都好睇，咩都carry到」

（係咁嫁啦，初為社畜同大學一年級生一樣，一定第一年每日會靚靚示人，期後如果可以既話直接踢拖返算吧）

「多謝寶兒姐姐，你上次讚我皮膚白搽咩唇膏都好睇，我開心左幾日，你今次想我開心多幾多日？我會唔好意思嘛，哈哈，都係你靚啲！」

「傻妹，我呢啲年紀算啦」

二人繼續閒聊。

但閒聊完，洛妍心諗：「唉，最慘係日日着都好睇都係無人問津，有啲丟架，哈哈」

(嘩，睇野啦，梁洛妍又自導自演了，唔係無人問津，只係問津既人都唔係你心目中想問津既個個人姐)

「喂，真野試下唔好拎出黎講？」洛妍姐想反駁。

(咁人地對你係冇興趣既，唔想識你既，你做咩都係多餘嫁啦話知你着到成隻雀咁啦，你知唔知人地眼尾都冇望過你一眼丫)

「好啦好啦，我梁洛妍正式宣布放棄R新同事講野，我有輝爺佢地夠晒數！」

「嗯，做野！精神！」(嚟個精神喊話先啦)

(續)

第六章、燃燒吧，動漫之魂！

「洛妍，你幫我過去問一問剛哥張單到底出現咩問題？」sing哥一黎就指派左洛妍今朝既首要任務。

「無問題，我依家過去問。你的勤快洛妍在線中。」

而行過去剛哥既座位之際咁啱就遇上輝爺佢地幾個（當然仲有吖言啦）

「喂，你今日著到咁既，個公仔係咪？」輝爺諗左好耐。

「唔準諗，即刻答。」

（快啲答啦）

「炭治郎！」輝爺又拍心口啦。

「有冇搞錯，呢個擺明係義勇，我最愛。」洛妍想翻白眼。

「喂，佢都中意義勇嫁！」輝爺指住身後既吖言。

（竟然押對了？）洛妍開心左一秒。

「唔係丫唔係丫」個個男仔對耳仔紅左少少，急住揮手否認。

「啊」洛妍個心沉左落谷底咁。

（到底係佢唔係中意鬼滅定佢唔係中意義勇？咁佢唔係啲咩先得嫁大佬？）

洛妍未黎得切反應，輝爺又問：「嘩你有冇咁中意鬼滅，著晒全套咁？」

「有，係年度最愛動漫！」洛妍眼裏面可以閃出光，答完大家都慢慢行返去自己工作崗位。

（正式收皮，話題完結左嫁啦，死左條心佢啦梁洛妍）

但過左一陣，大家又係剛哥個座位附近相遇。

「真係咁中意鬼滅？有冇咁好睇？」輝爺忍唔住又問多次。

「好好睇！」洛妍一提起鬼滅就會興奮到扎扎跳嫁啦。

「吖言都有睇嫁啲，係咪丫？」輝爺開始撩埋叫言加入討論。

「嗯。你中意邊個？」佢好似唔係望住洛妍答。

（你終於都開金口，今鋪真係值回票價）

「咪水柱囉，你呢？」

「兩個上六。」

「下，點解既？」

(個個都中意炭仔，你咁特別既？)

「上六既兄妹情打動到我。」

「都係既，仲好慘添」

「考下你，上六丫哥叫咩名？」

「嘩死啦我一時諗唔起丫，可唔可以比我溫下書先。」洛妍緊張躊躇。

(緊張死我啦，無啦啦突擊測驗都有既？明明我頭先預左收皮嫁嘛)

「三二」

就係千鈞一髮之際：

「妓夫太郎！」

洛妍終於諗起，成功挽回鬼滅忠粉形象！

「啱喎！」吔言認真mode。

(終於係咪想開心死我？我想給輝爺加雞腿～)

「你地都快啲去睇下啦！」洛妍向住輝爺佢哋講。

「我地都唔太中意動漫既，留返比你同吔言啦。」

「可惜了」洛妍嘆左下氣

(唔可惜唔可惜，嘻嘻。)

閒聊完大家就散水，又返去繼續努力工作。但短短呢幾分鐘足夠令洛妍開心一整日，因為自己目標達到左，佢心足了。

(情報已收集，原來佢中意鬼滅，呢鋪真係押對了我太聰明啦，既然話匣子已經打開左，咁認識冇難度了吧？)

(呼終於識晒全村人)

過左一陣，梁洛妍導演的內心戲場開播左：

(有冇聽過打蛇隨棍上？呢啲野唔洗野野要人教吓話？)

「喂你又想點丫？」

(趁個火旺就好煽多兩下啦)

「又咩丫，咪認識左囉，夠皮啦！」

(嘩你邊有做同事做到人地都未知你叫咩名)

「佢會知嫁啦！輝爺會同佢介紹我嫁啦」

(實係啦，你又知人地叫咩名既？)

「咪咁言囉」

(你睇你心虛到，想知多啲、想人親口答又死口唔認)

「得得得，你贏！咁你覺得我應該？」

洛妍終於係公司whatsapp群組搵到咁言既電話：

「洛妍姐姐送鬼滅sticker比你！」

(咁樣介紹自己咪掂晒囉，禮貌得黎又可以加插返少少個人資訊)

「啲貼圖好得意咁都比你搵到我電話。」

「啊你全名叫咩丫？姐姐我想知你姓咩」

「冇冇機會係我大過你呢，姐姐？比個機會你估我幾多歲」

「我唔知丫，但睇落你仲後生過我。」

「所以你答左你個名啦咩？」洛妍再追問多次，

「我姓徐，名亦言。」

睇到個名之後，洛妍會心一笑，隨口講左句「隨心亦言。」

就係咁，洛妍同亦言兩個人由呢一度展開左對話，由生日星座傾到去動漫劇情，仲傾左一日，傾到凌晨兩點幾都唔願訓。

(續)

第七章、彼此交織的命運

命運之神原來一早靜靜地為梁洛妍同徐亦言套上左一頭一尾既命運繩索，只係兩個人一開始都係背對住對方，其實兩個人咁啱都有拎轉頭望到對方，只可惜佢地都有對望到。

因為時機

洛妍同咁言係短短既日子好快變得熟絡。真係唔傾都唔知大家原來咁啱傾，大家中意既無論係動漫角色定係劇情，觀點同睇法都相同。

「真係相逢恨晚丫言哥！」

「你簡直係我既知音。」

「你早兩個星期撩我講野咪好囉，可以傾到天昏地暗」洛妍開始抱怨。

「咁我怕醜係真事嘛。」（好似有人唔好意思開口）

「咁我由舊址搬黎呢到我都怕生丫，邊似你一黎返新址，咁你一早熟晒環境嘛。點同我比啱」

「唔係丫，我都係早你少少過嚟新址，我本身都係舊址既人黎嫁。」

「下？但我唔見你既？」洛妍真心一問。

「哦，我諗你入職個時就係咁啱係我過黎新址既時候。」

「唉，咁又緣慳一面左。因為我平時都會跟住sing哥走黎走去，所以我都見過公司好多同事」洛妍心諗：早啲識就好啦不過唔知咁言係咪都係咁諗呢？

「但依家識都未遲既」

「都係既！」洛妍重新笑返。
(或者個天係呢個時候安排我地認識，一定有佢既用意)

「講個秘密比你聽啦，知音」

「？」

「其實我一開始見到你就已經好想認識你」

「嘩，我完全睇唔出啱，見你一直好cool，唔撩我講野，仲以為你唔想同我講野添」

「咪話左怕醜囉師兄，又要逼人解釋多次既」

「如果我話比你知，其實我都因為想同你講野先會著鬼滅既tee，想吸引下你既注意呢？」

「唔係真事掛？少少感動！」

「真事黎。」

如是者，佢地兩個人愈傾愈啱傾咁，傾到兩個人既whatsapp由朝早到夜晚都係在線既程度，因為發覺太多野都相似，每一日都有唔同既話題，咩星座動漫已經太濕碎，講講下發現原來兩個人既喜好都一樣，一樣識跳舞、中意既顏色甚至係拍拖經歷都類同。

「你又係中意妖精尾巴咩？我都係丫！」

「估你唔到，你仲迷過我。」

「如果早啲識你就好你知唔知我由係新址返工開始食完飯都會趕返公司自己拎手機睇幾集因為身邊冇人中意睇呢套，所以只可能自己煲。」

「唉，早識既話我一早陪你睇到去完結篇啦」

「講講下又好想睇返。」

「不如依家即刻開DC睇返一集先？」

「下，一早開左電腦等你啦。」

「哈哈哈哈——」

「唉，本身都唔想搞咁多野嫁啦，但見你咁有誠意，我唯有勉為其難陪你睇至少一季啦今晚」

「喂哈哈哈哈，車輪戰咁煲，好爽」

(估唔到佢都幾幽默，同佢一齊傾計呢好輕鬆，氣氛都幾好)

「噏，個男主角下一秒就會出現嫁啦！」

「？」

下一秒，男主角真係出現左！

「噏，係咪丫？我背熟晒嫁」

「係啲 (好叻丫) 但試下唔好劇透師兄！」

(可能跟得佢多，自己都跟左佢講呢啲口頭禪)

「唔係丫」佢言心虛到口窒窒。

「哈哈咁都唔認？」洛妍笑到仆。

聽完，佢言自己都笑返自己。

「覺得你好搞笑，死口唔認之餘，否認嘅時候都會帶點無力感，哈哈哈哈」

「哈哈哈哈，比你發現左添」

(點解呢個男仔咁搞笑既)

「唔係丫」洛妍笑住扮佢言既口吻。

「你又扮得幾似嫁嗰，笑死」

二個人就係咁傾到去凌晨三點。

「咩話？你又係中意紫色？到底有咩係唔一樣嫁？」

「應該冇樣係唔一樣」

「我好中意我個生日日期嫁，所以手機個password 都set左生日」

「你幾時生日？」

「4月20號」

「下，你認真既？」洛妍呆左。

「做咩？」

「我個staff number 係420」

「有冇咁啱丫？」

「我以前中意過同你同星座既男仔，你地性格幾似下，嘻嘻。」

「嘩，係咪有故事要分享？」

(有冇咁啱得咁橋丫？造馬咋掛？)

(故事、經歷、鍾情既野樣樣都可以假，但一見如故既感覺係呢唔到人)

(唉 · 我真係好想繼續同你日傾夜傾)

(只可惜我做兩個月就走 · 唔知之後大家仲會唔會聯絡呢)

(定係唔好投放咁多感情落去聯絡好呢 · 以免我辭職個日大家唔開心)

(不過我擔心既野又好似發生左 ? 人地女朋友會唔會介意嫁 ? 我唔想做個種女仔丫)

(但人生難得一知己喎 · 唔傾盡對唔住自己丫 · 你自己都預計到嫁啦 · 要搵到好似咁言咁既人既機率好好好好微)

(但係)

(但咩係姐 · 只要你知自己咩position · 有分寸咪得囉)

(咁男女之間可以有純友誼 ?)

(冇既話你咪做左先鋒先囉 · 為廣大既人類界做榜樣)

短短呢幾日入面 · 洛妍同咁言唔知講左幾多次 「 如果早啲識 」

(真係隔住個mon都感覺到個種緣慳一面既可惜)

(命運之神丫 · 挽少我地一陣得唔得 ?)

儘管洛妍知可能如果再咁落去會令人誤會 · 但洛妍決定跟隨左自己既心 · 繼續同咁言傾計 。

(續)

第八章、早安，我的鏡子

命運之神終於伸手捉住綁係梁洛妍同徐亦言身上既命運繩索，用力咁扯左條繩一下，綁係一頭一尾既兩個人頓時感覺到一刻強烈既繃緊感所以兩人拎轉頭回望。

兩個人同時映入眼簾既都係一個清秀既五官，而對方同時都係望住自己。當佢地互相見到對方既個一下，兩個人既心臟都同時漏左一拍

兩個人無論係返工定係放工都keep住whatsapp，係公司只要兩個人一做完手頭上既野就會即刻覆message，兩個人不時會比對方既message逗笑，誇張到每隔兩三條訊息就微笑、大笑、甜笑都出齊。

身邊既同事都好好奇洛妍同邊個whatsapp得咁開心，同時又好奇平時好少笑既亦言最近做咩都成日望住電話傻笑。

「洛妍，你笑咩？」sing哥見到洛妍最近有啲反常，忍唔住開口問。

「我？我我邊有笑？」

「咁都冇笑？做咩即刻收埋電話？咁鬼鼠？」

「我邊有鬼鼠喎」
(嘩，你睇你心虛到呢)

「邊個黎嫁？」

「你唔識嫁啦！」

「點會丫？哦我知邊個啦！」

「咩丫咩丫，我唔知你講咩喎！」
(唔係掛，千祈唔好估到丫！)

「唉，洛妍變啦食飯又唔同我食，有野又唔同我講」sing哥心灰意冷左。

聽完洛妍忍住笑意繼續做野，做完就whatsapp返比某個人，分享返呢件事比佢聽。

逐漸兩個人愈行愈近，甚至一起身第一個拎起電話聯絡既就係對方，訓之前最後一個聯絡既都係對方。

「其實依家諗返起，覺得同你相識到真係好奇妙、好奇幻咁。」洛妍主動提起。

「我都覺！」

「估唔到我同你係會熟到去呢個地步」

「我都估唔到，我依家好依賴你」

「你估我唔係咩？」

「你知唔知你已經係我返工既動力？」

「咁啱既？我都係丫！我每日都好期待同你挽，返工放工都會好想繼續同你傾計，我地好似有無窮無盡嘅話題咁，我真係好開心！」

「我都係，真係有太多樂趣，特別係我地都get到對方既點同梗！超神奇！」

「哈哈哈哈哈超級認同！同埋愈傾愈發覺好多地方我地都好似！」

「我其實真係覺得你係女版既我！！好痴線，同你講野我覺得好似照緊鏡咁！」

「你呢個形容真係好貼切！」

(原來佢都有同感！)

「咁以後你就係小鏡啦！」

「嗯嗯，我係你既小鏡，咁你係咪大鏡？哈哈」

(唔通叫放大鏡咩笑死，咪係呢啲時候搞gag得唔得，正經啲啦)

「都係叫鏡鏡親切啲！」洛妍笑住講：「嗱嗱臨改返個聯絡人名先啦」

「一早改左啦。」

「下？」

「cap比你睇下啦」

「係啲！」

(唔知點解有種sweet既感覺，可能係因為我獲得左一個暱稱，如果佢以後都咁親口稱呼我就好啦)

「係啲，我今日早收工丫！」洛妍醒起一陣3點有野做。

「哦，又去返第二份工呢？」

「嗯嗯，係得你知我另外返補習嫁咋，嘻！」

「你有冇時間休息嫁？」

「我掂嫁啦，唔洗擔心我！」

「你真係好勤力。」

「讚我我會囂，夠鐘放工啦我！」

「Oh 咁聽日見！」

「嗯！」

洛妍放左工之後竟然唔係搭去補習社，反而係去左旺角

「你好，今日想整咩髮型？」

「啊，我想整呢隻色。」洛妍打開相簿show比髮型師睇。

「有啲難度啲你漂過深色，所以呢隻色一整上去會難上色丫，不如揀過另一隻啦！」

「我唔理！我唔制！一定要呢隻，哈哈」

「你咁可愛既好啦好啦，你預要坐4-5個鐘」

「我早有預備啦特登帶埋電腦黎煲劇，放心慢慢整！」

整緊既途中，髮型師見到洛妍個電腦mon問左一句：「你睇緊咩動漫？」

「哦，妖精尾巴，好耐嫁啦」

「以為你係會睇韓劇既女仔」

「我都會，不過應承咗人睇埋呢集！」

耶！苦等4個鐘終於整好個頭啦！真係幾好睇啲隻色

「聽日返工要比佢（地）一個驚喜先！唔知佢（地）中唔中意我個新髮色呢？」洛妍又係到自言自語。

翌日七點

叮——洛妍手機收到既訊息：

「早安，小鏡」

第九章、只屬於一人的SSR

七點十五分

「啊！仆街啦！我唔知醒丫！實遲啦」洛妍係床到彈左起身大叫。

「唉唔睇電話啦，直接換衫刷牙出門啦！」

叮——

「唔覆既？」

洛妍直接係搭車既時候係車到化妝同埋紮頭髮，所以一直唔得閒覆電話，直到差唔多返到公司樓下先睇電話。

「鏡鏡，早晨！我頭先遲左起身」

「我都估到嫁啦，平時冇理由咁耐都唔覆」

「我唔想冇勤工獎攞丫，嗚嗚」

「笑死」

「唔講住，我跑返公司啦，希望35分前到公司啦」

(唉，又會咁啱染左個新頭先黎遲到既，我想做眾人既焦點但冇expect咁做法，因為遲到會比其他同事唔好既印象嘛)

(唉你仲有時間諗咁多野？跑啦衰女)

「等埋等埋！」洛妍一個轉身射個三分波咁既流暢度趕到班lift，終於係八點三十五分個刻跑到入公司門。

「呼真係好彩！」洛妍氣都未喘完就聽到茶水間傳來幾聲讚嘆聲。

「嘩～」

洛妍一抬起頭就見到輝爺佢地幾個圍住個門口，全部人都比洛妍個髮色吸引住。

「個頭幾好睇啎」輝爺施施然咁行過黎咁講。

叮——

「嘩，小鏡你個頭小靚啎」亦言即刻用message 讚洛妍。

(嘻嘻，睇黎大家都覺得好睇，最起碼佢中意 (?) 最起碼佢覺得好睇)

(係salon坐到腰骨痛都值了)

(但我想聽佢親口讚)

(收聲啦·人地肯讚咪算係咁囉·仲想人地點?)

「嘻嘻·我琴日早走既原因·想比你地一個驚喜！」洛妍秒回。

「係紫粉色丫!!!好夢幻既髮色!想問你係邊套動漫行出黎既女主角?」隔住個mon都feel到亦言既激動。

睇到呢到呢位女主角個嘴角就黎拉到上太陽穴咁濟。

(試吓唔好咁開心·咁易面紅啦梁洛妍)

(咩丫?有人讚係咁開心嫁啦加上我都未試過咁樣比人讚法)

(佢啱睇就好)

如是者·洛妍維持一整日既好心情返工。

「心情好靚咁啱洛妍姐姐?」sing哥見到洛妍笑足左一日·好奇之下一問。

「係咩?因為我比人讚囉!好唔好睇先我個髮色?」

「普通吧·我覺得你之前啡色好睇啲·因為我中意啡色」

「唉·你都唔識野既!夢幻髮色黎嫁」

(好彩有人識貨·哼!)

(佢啱睇咪得囉)

就係呢個時候·

叮——

「喂喂·小鏡·想講好耐·你今日著得好好睇!」

「係咩·嘻嘻·我都唔知丫·我今日就係想咁着·好韓系呢?」洛妍偷笑回覆。

「唔係·係日系先啱!」

「從來冇人讚過我日系·哈哈!」

「你知唔知——我中意菱格冷衫?」

「真係咩，我都中意嫁！」

「你今日既配置簡直係SSR！太好睇啦！」

「讚到我天上有地下冇咁」

(我靜係想知我個嘴角捨得放落黎未？)

「如果唔洗做野既話，我真係想擔張凳仔坐你隔離，望足你一日」

(好彩佢見唔到我面紅個樣姐)

「嘻嘻，係咪真嫁？」

「真嫁！我都唔講大話既！」

(比面你我唔笑你啦！)

「不過我留意左你個袋好耐，因為我都中意vans既黑白格仔！」洛妍笑笑下又提起。

「點解連中意啲咩pattern 都一樣既好神奇ㄚ」

「我地有樣係唔一樣嫁咩？」

「咁又係！麻煩大聲講左次我係邊個？」

「鏡鏡！」

(呢下係咪要有歡呼聲？)

(呢個名真係意義非凡到一個點，本小姐好滿意)

「人靚、夢幻髮色、SSR套裝，我真係諗唔到點輸」

「再讚我會囂嫁！」

「係你咪咁謙啦」

(如果能夠成為佢眼中好特別個個，我真係死而無憾)

(真係冇諗過我同佢係會有咁既發展，咁cool既外表之下，竟然咁有反差萌，望住我套衫同個髮色個時好讚嘆個樣，仲可愛過我(?)

「好想睇多次SSR」

「你啱先咪睇左囉？」

「唔夠ㄚ，我同你既工作崗位都唔同，冇得無時無刻見到ㄚ嘛，幾可惜先得嫁。」

五分鐘後

叮——

今次輪到亦言電話收到whatsapp message：

相片

「嘩！」亦言激動mode。

「見你咁想睇，做比你！」

「自拍好睇到」

「得一次嫁咋」

「呢啲係每日任務黎，要堅持完成既」

「你好貪心丫！」洛妍一路甜笑一路覆。

「我係嫁！」

(佢係咪對個個女仔都係咁？)

(可能佢貪得意先會咁講唔洗咁上心啦)

(咁都係既，但佢算啦算啦唔好理咁多，愈諗愈唔開心)

翌日

洛妍一如既往，準時返到公司既時候，電話又響起。

叮——

「今日小鏡都係SSR！」亦言果然係一言不合就開讚。

「點解既？好睇咩？我之前返工都試過係咁著」

「超好睇！靚到傻！」

「真係？」

「我最中意女仔著小皮鞋、白色恤衫、黑色短西褲，你真係著咩都好好睇！簡直係人型衣架」

「嘻嘻！我係今日唔知點解係想咁着，估唔到誤打誤撞着左你心目中既SSR！」洛妍又比人氹到心花怒放。

(原來佢中意日系斯文風穿搭)

(我平時咁啱都係著開斯文風)

(以後識做啦？以後就決定用你啦小皮鞋！)

(難得同事中意睇，養下人地眼都係作為新同事自己責任黎既！)

(想吸引下人地目光咪認囉！唉，算啦，你點話點好啦，藉口達人梁洛妍)

「以後可唔可以都許願睇SSR?」

「睇心情啦咁我送張許願卷比你，你想睇就用啦！」

「一張咁少咋？」

「你個貪心佬丫，比你一開二，減半張使用啦！」洛妍偷笑。

「太珍貴啦，我唔捨得用，留黎有其他用途」

「哈哈，你有咩特別用途？咁誇張，可能我隨時心情好會送到幾張俾你」

「咁我希望小鏡日日都心情好！」

(嗯我最近，由識到你開始，日日都好)

(係咪因為我同你日傾夜傾呢，短短一個月我已經好依賴你，好想每日由朝到晚都同你WhatsApp，好想每日返工見到你)

(記得見你有一次隔左兩個鐘先至覆我，我唔知點解個心好不安但點知你又突然上線話你去咗睇戲，我個心當下即刻鬆左口氣！)

(但下一秒又好想問你係咪同女朋友出街，雖然到最後唔敢問)

(關咩事？你怕人地唔知做咩唔覆你，怕少左個人陪你咋掛？)

(會唔會係咁？)

(喂梁洛妍，你以為自己係邊個？醒下，好？)

第十章、專屬天蠍座的愛情公式

公司既冷氣機最近壞左，所以公司訂左5部大型吹風機放係公司不同角落，但每部都要自行組裝螺絲，可惜組裝吹風機唔屬於任何一位同事既職責，所以高層希望有自願出黎頂既男同事

「我啦我啦」迪仔舉左手。

「得啦識左你十三年，點會比你自已一個整晒咁辛苦？」亦言輕輕拍左一下迪仔既膊頭。

「果然夠老友！」

「我一陣過黎幫拖！」亦言一路講一路行返去位。

迪仔係亦言既中學同學，主打係公司show off一段十三年既兄弟情。

因為迪仔係一個不拘小節既人，好少計較自己做多定做少，所以成日比老同事欺壓。當迪仔受委屈既時候，亦言都會出自唔忍心，為佢挺身而出。

洛妍咁啱行過聽到迪仔自願幫手組裝風機，個腦閃過一絲念頭，隨即同主管講話自己都想幫手。然而，亦言係唔知洛妍自己過左黎幫手。

過左一陣，亦言做完手頭既野打算慢慢行去搵迪仔，但當佢愈行愈近迪仔既時候，佢開始聽到一啲此起彼落既聲線：

「放手丫！洛妍姐姐！」迪仔大叫。

「我唔要！」洛妍搶左迪仔手上既螺絲批，跪左係地下開始扭螺絲。

「咪咁硬頸啦！」

「喂喂喂！你做咩丫？」亦言一見到洛妍係到上螺絲個時就跑過去問佢。

「幫緊你，幫緊你囉！」洛妍專心整，唔敢同亦言對望。

(死啦，佢一行埋黎我都好緊張試吓唔好手震先？)

「唔好挽啦師兄，你乖乖地坐返電腦檯得唔得？」亦言心急左。

「唔得！」

「喂，你做咩比佢整丫？」亦言轉身質問迪仔。

迪仔好無奈咁話：「我冇比佢整丫，但佢自己搶左去，但我地呢到得一個螺絲批咋」

「你放返低先啦，唔好整污糟自己同套SSR」亦言勸洛妍。

(其實我唔怕整污糟自己，只係怕你地太辛苦咋)

「唔緊要啦！我唔怕！」

「點解好地地有電腦檯唔坐，過黎整污糟自己？」迪仔想搶洛妍既螺絲批，但比洛妍推開左。

「因為我知呢啲唔係你地既職責，無理由要你地整晒嫁嘛，所以我咪黎幫手」

(我知你地係公司都受左好多委屈，我知我幫唔到你地幾多，但我想用行動話比你地聽，我唔會好似舊同事咁捨棄你地，雖然我做既係好微細但我希望咁做都可以比到一點點既安慰比你地，話比你地知仲有人心痛你地既付出，為你地受到既不公而無聲抗議)

(亦言咁善良，之前試過一次為迪仔發聲而得罪左舊同事，今次我係咪都可以好似佢咁，咁勇敢守護一個人？只不過，今次守護既對象就調返轉就好似佢想守護迪仔咁去守護佢)

其他人見勸唔掂洛妍，終於比佢繼續整，但上冇兩粒洛妍手腕都開始痛。

以前洛妍都試過上螺絲整電器，但今次個風機無論係體積定螺絲既重量都遠超以往洛妍整過既，所以洛妍顯得分外吃力，好快唔夠力，但佢依然堅持，就係因為佢依家擁有一顆想要守護一個人既心。

呢個時候office

既leader朱朱行左出黎見到跪左係地上既裝修女工人洛妍之後走過黎問：「你係到做咩？點解得你一個女仔係到做，班男仔靜係望住你做？」

「唔係丫，係我自願話幫手，佢地想幫我既但係我唔比咋」

「下次交比佢地啦」講完朱朱就返埋位懶理。

(都話呢間公司涼薄嫁啦過嚟問都係出自好奇點解個要個女仔整，唔會諗下班男仔既辛苦)

(儘管我面前咁多同事既提問我一律都答班男仔冇義務整，但似乎都喚不醒佢地既反省)

(唔緊要啦，做自己本分就好)

好艱辛咁上完八粒螺絲之後，仲要抬起部風機入電池先叫完成，洛妍不以為然放底左個螺絲批再幫手稱起風機，到佢想接着整下一部風機個時，發覺螺絲批唔見左，下一秒佢見到迪仔已經拎住左個批准備整。

「你地唔好咁啦，我都係想幫你地姐」洛妍苦苦哀求。

「夠嫁啦！有心夠嫁啦」迪仔冇正面望洛妍。

「我唔想你地做晒啲野冇人幫」

「出黎做野邊有得計較咁多啲！」

(就係因為你唔計較，亦言先會心痛你，為你發聲、幫你頂)

(都唔知係好事定壞事)

「咁我仲有冇咩可以幫手？」

「有冇有冇，你幫我去返你自己個位」亦言指住左邊，洛妍好專心咁聽。

亦言繼續講：「打開你檯面部電腦，繼續打單！」

「欸！」洛妍忍唔住大笑。

(佢平時都係咁氹女仔？)

(佢真係好搞笑)

「亦言真係好識氹女仔笑所有女都比你溝晒啦！」迪仔打斷左兩人既對話。

(嗯嗯，誰酸了，我不說)

洛妍點頭認真：「比條生路其他男同事啦徐亦言！」

(迪仔係咪都見過亦言點氹佢女朋友笑？)

(佢仲有氹邊個女仔笑呢？)

講完洛妍打算收埋晒啲螺絲，打算重奪螺絲批掌控權之際，亦言即時心領神會，快先過洛妍一步想搶螺絲以免洛妍再上螺絲會整親。

「喂！唔準唔準！放開手手！講真既！」洛妍捉住亦言個隻已經拎起左螺絲既手，慢慢攤開佢既手指：「你有帶手套冇，萬一拮親手點算？」

(我成世女都未試過咁惡既語氣講最溫柔既說話，呢個係咪我黎嫁？)

(我唔想佢整親冇！)

亦言停頓左半秒，佢終於冇搶而係放開左個拳頭。

(佢個樣好似好乖咁唔知點解想摸下佢個頭)

如是者，三人結束左搶螺絲批搶螺絲大武鬥演，變左輪流整，最後終於整好左。

(呼終於整完但我想留係到多一陣)

「咳咳」亦言咳嗽聲引起左洛妍既注意。

「你有事冇嘛？」洛妍忍唔住關心亦言。

「冇丫，就係喉嚨有啲痛」

「啊！我locker有沖劑既清熱酷，拎比你丫」

「下，有用嫁咩？」

「我唔知丫，但佢個包裝寫住可以增強抵抗力啲」

「好啦好啦，試下啦咁」

洛妍同亦言入左去茶水間，洛妍開左locker拎完再問佢拎佢既水杯，之後走向水機禁凍水。

「下，唔係用熱水沖嫁咩？」亦言好奇一問。

「所以我先叫你將個水杯交比我，等我沖就係因為怕你一野杯左熱水，係用凍水嫁！」

「係啲，個包裝真係咁寫」

「因為十個有九個都已經問過我點解唔係用熱水我已經懶得解釋，哈哈！」

(關咩事，咁你依家都解釋左啦！)

(懶得解釋係假既，但想付出下就係真既)

(你咁奇怪既梁洛妍，咁多人唔幫靜係甘心幫徐亦言？)

(冇冇冇！我個個都幫既！冇幫個啲係人地冇問姐)

(咁又係丫咁主動關心人，仲洗咩人地自己開口)

(我左習慣照顧人，唯楓教既)

(哦)

洛妍望住亦言放左係檯面既電話，陷入半秒沉思。

(佢個mon貼崩左一角啲)

洛妍順勢拎起亦言部電話，指住個機殼問：「呢個係咩？」

(唔可以問得咁明顯)

「煤炭屎鬼公仔囉。」

(我知唔係問個機殼公仔丫)

「唔係！我想問呢個係咪iphone 14pro max丫」

「哦，唔係max丫」

「真係？我以為係max添。」
(double confirm 下)

(醉翁之意不在酒，情報已收集)

如是者，當洛妍行返埋位做野個時，佢偷偷地拎個電話出黎，輕輕禁左一個制——

「提交訂單」

今日一切安好，大家工作都幹勁足咁，可能因為整好左風機，大家冇咁熱。但就係臨收工前半個鐘：

叮——

相片

「嘩！你點丫？」洛妍秒回。

「冇丫，我頭先都唔知係邊到刮到，就咁就流血。」

「痛唔痛？咁唔小心既！」
(喂？好擔心人咁啲？)

「啊，你好彩！我今日著新鞋怕刮腳真係袋左幾塊膠布係袋。」洛妍醒起。

(其實呢個世界真係有冇咁多巧合呢)

(巧到我都唔信係真事)

「唔洗啦，咁麻煩」

「唔得！一定要包好有細菌丫！」洛妍堅持，跟住message 亦言入茶水間等佢。

(都係拎埋酒精同佢消毒左先好啲)

(會好嚟嫁啲，唔知佢怕唔怕痛？)

(問下先)

「呢枝咩黎嫁？」亦言一早乖乖地坐左係茶水間等洛妍，見到洛妍拎左一枝野放左係檯面。

「酒精囉，消左毒先啦，污糟丫比我睇下」洛妍問亦言伸手睇下傷口。

「其實個傷口好細姐唔貼都得既。」亦言想縮返隻手。

「哦，咁算囉」

(唉，做多左啦梁洛妍)

「咁又唔好都拎左出黎啦」

(點解我好似好緊張佢整親咁既？正常咩？)

洛妍倒左少少酒精係紙巾幫亦言抹下傷口，然後慢慢撕開膠布包裝。

「痛唔痛丫？」洛妍皺眉一下。

亦言搖頭。

(梁洛妍，試下唔好手震？)

(咪當貼街招咁囉，放鬆啲！)

(唔係丫，同佢坐得好近緊張正常掛？)

「唔該你！」

「下次小心啲啦！」

(就係對我最好既答謝)

(佢唔整親你邊有機會坐佢隔離幫人貼膠布？)

(咁我寧願一世我坐唔到佢隔離，都唔想佢整親)

(事關我都幾心痛下)

放左工之後，洛妍沖完涼吹完頭覺得無聊就拎起左本書睇，突然間電話響左，上面寫住個熟悉既人名。

(啊佢第一次打比我)

(聽唔聽好？)

(你係咪傻？老虎都聽左先啦！難得人地做左次主動，係咁意回應下都要既)

(「係咁意」？)

(咁我遲兩秒聽夠有矜持啦掛？)

(咪繼續呃人呃自己囉)

洛妍禁左個綠色制，第一句聽到既係

「喂，你真係聽電話嫁？哈哈」亦言驚喜左一秒。

「咁我收線囉！」你的佻皮洛妍在線中。

「喂喂喂，咁又唔好」

「嘻嘻」

(只有我知點對付你女仔係中意人地挽留自己，因為咁先知自己係對方心目中有幾重要)

「你真係幾佻皮嫁嗰」

「係嗰，你隻手點丫？」

「冇事丫，唔痛啦」

「咁就好啦」

「唔好再咁唔小心啦！」

(我究竟講左幾多次？人地會唔會嫌我煩？)

佢地閒聊左一陣 (一陣係兩個幾鐘囉)

「夜啦，聽日返工就早啲訓啦」洛妍開始打喊露。

「哦，我聽日放假丫！」

「下」

(咁我個mon貼咪)

「做咩啦？」亦言問

「冇冇冇，我見你成日返工以為你聽日都返添，你透下都好既，成日OT」洛妍掩飾緊自己既失落。

「哦，我不鏟都揀星期三放假既。不過都真係夜啦早透！做個好夢！」

「嗯！早透！」

洛妍收左線之後就上返床，但又未咁快訓得着，所以又拎起電話碌下IG，比佢咁睇到一個星座帖文寫住

「12星座喜歡一個人的表現：

天蠍座：對TA貼心浪漫」

洛妍默默點左帖子兩下，然後熄左個電話mon訓覺。

(續)

第十一章、辦公室內的粉紅泡泡

七點三十分

(咦？佢到依家都未覆我whatsapp既？唔通佢都係未起身？)

(唔會既，佢平時都好準時起身覆我)

(點呢？好唔好打電話問佢起身未？驚佢遲到啫)

(人地遲關你咩事啫)

(咁你依家打得比佢未？)

(我驚朝早同人冇話題啫)

(人地會唔會好似我咁有起床氣？)

(點會？我都未見過佢發老皮既)

(點姐？就黎搭九啦啫)

(咁打咪打囉，留意返係你叫打我先打嫁咋，根本唔係我自己想打)

「喂？」

「咦？你未試過打比我嫁啫仲要係朝早！」

「係丫，見你耐冇覆丫嘛，以為你未起身」

「我頭先遲左起身，做咩啦？」

「冇丫，我擔心啲同事冇勤工獎拎丫嘛，你知我人好」洛妍唔知自己有冇心虛。

「哈哈哦」徐亦言唔知係咪笑到見牙唔見眼。

(咪繼續兜囉梁洛妍，不過見佢笑得幾開心，做下小丑又有咩所謂啊)

「喂你到邊？」洛妍問。

「商場。」

「我都係啫。」

「咁不如洗唔洗等埋你？」

「下，呢啲野唔洗問嫁啦吓話？」
(呢碌木今日咁叻豬既)

兩個爆笑左幾秒。

「樓下等啦」

「嗯！」

就係咁，佢地一齊行返公司，途中都遇到幾個同事，佢地都向洛妍亦言投以一種奇異既目光，但洛妍亦言都有理會佢地既目光，繼續專心傾計，直到行到返公司，兩人如常工作。

洛妍既座位附近就係茶水間入口，但背對茶水間入口，所以任何同事行去茶水間既路途中一定會見到洛妍，洛妍如是。

最近洛妍成日做做下野都會分神，因為佢成日比行去茶水間既身影吸引目光，每當佢抬高頭望下行過既同事個樣既時候，好快又會耷低頭。

(做咩丫？想望咩？)

(係咪見唔到自己想見個個人，所以耷得咁快？)

(邊係？我係茶水間登記大使黎嫁嘛，望下邊個好正常)

(唔洗唔認，你睇你每次都咁失落)

(我失望佢地去茶水間都唔主動過黎登記個名咋，要我逐個認樣)

就係呢個時候，一個啡紅髮同時身穿黑色tee、卡其色短褲既黑影閃過，洛妍即刻抬起頭望，終於係個個令佢安心既五官

但洛妍知自己唔可以望得太明顯，所以好快耷低頭繼續用電腦。同時，呢個啡紅色頭髮既男仔就係洛妍耷低頭下一秒視線掃向去洛妍，好快望左兩秒，又裝作若無其事走開。

就係咁，兩人既四目並無交投。然而，兩人都唔知各自己已經係腦海中回放緊頭先望到對方既畫面。

「洛妍姐姐！」

「閔哥？咩事？」

閔哥係亦言既上司，平時好錫亦言，自從公司一啲座位調動之後，洛妍就坐閔哥附近既位置，自此洛妍開始同閔哥日漸熟絡，洛妍慢慢都認為閔哥係個好上司，因為佢會好照顧下屬（特別係某人）洛妍覺得簡直應該叫佢做閔爸，因為佢對下屬就好似親生仔女咁，佢從來都有鬧過下屬，又會唔比女同事做粗重野，份人挽得講得笑，但工作個時又好認真、好有責任心（同某人一樣）。雖然閔哥成日調侃下洛妍亦言兩個人，但佢好錫佢地兩個。

「我有冇清熱酷飲丫？」

洛妍呆左一陣，笑住問：「點點解閔哥你會知既？」

(我個心臟好似停止左跳動咁)

「唔知丫，我見到囉！」

「你見到啲咩丫閔哥？」

「冇丫，除左見到清熱酷，仲見到過雪糕囉」

「咩雪糕丫？我都唔知你講咩」

(我開始心虛)

(點解佢會知既？)

「哦，咪就係前幾日，有啲同事係茶水間食雪糕囉，咪就係你一啖我一啖咁食囉！不過我睇唔到樣嫁！」

洛妍已經忍不住嘴角，係個位到爆笑左出黎，閔哥跟住一齊笑。(閔哥係姨母笑！)

(死啦！閔哥睇到添)

(閔哥好似幾中意我地？)

(等等先，人地有女朋友嫁啦，閔哥係公司講笑咋，咪當真)

(如果係真既話)

(冇如果！)

洛妍笑容僵硬左：「冇丫！冇啲咁既事！你睇錯啦閔哥」下一秒洛妍轉身面對返部電腦，唔係佢幾想做野，而係佢怕比閔哥見到自己失落心煩個樣，怕佢會突然問起自己係咪唔開心，事關佢會唔知點解釋。

(點解你會有呢種失落感？)

(我唔知丫)

(等等先，我冇嗰！零失落！)

(我我只係覺得好笑姐未試過係公司被人炒CP，咁失落就係因為我到依家都未搵到男朋友囉！)

叮——洛妍手機既whatsapp：

「喂，一陣食完飯去內閣傾下計啦！」

過左一陣洛妍既回覆：

「好吧」

內閣係公司一個角落頭，因為位置偏僻啲，比較少同事行過，所以我地統稱個個角落叫內角內角——「內閣」。

「點丫？係咪想學breaking？」

「係丫！係丫！係咪教我？」
(我自學左好耐都做唔到freeze)

「嘩，我示範一次比你睇」亦言除底左副眼鏡，雙手禁地示範左一次標準既baby freeze 比洛妍睇。

「嘩！好勁丫！」
(點解呢個男仔可以咁型？)

(人又靚仔又同我咁傾又同我咁夾？仲要同我喜好一樣，中意跳舞)

(收埋你個花痴樣啦梁洛妍！)

洛妍回過神來，打算照做亦言既動作，正當佢想雙手禁地之際，亦言叫停左佢：「喂痴線嫁？唔準你整污糟套ssr同我個夢幻髮型！」

「你知我唔怕污糟」

「唔得丫！」

洛妍最終妥協，佢地兩個又由跳舞傾到去RAP再講到去改詞心得，傾到lunchtime完。兩個人意猶未盡咁，所以約好每次食完飯都過去內閣玩。

佢地有時又會約埋入去茶水間，百忙之中抽空黎閒聊兩三句，互相分享返輝爺同閔哥佢地點調侃佢地，每次聽完佢地個都會會心微笑。(會心大笑其實係)

「喂你知唔知閔哥今日全日對住我姨母笑，好搞笑佢個樣」

「哈哈」

「佢仲問我係咪又想(一齊)食雪糕？我同佢又爆笑左！」

「咁你點答佢？」

「我咪學你囉我都唔知你講咩～我問佢做咩咁關心我地，佢話佢覺得洛妍同亦言檔節目好吸引好好睇，佢話身為家庭觀眾嘅佢，非常期待日日有得睇！」

「笑死！咩家庭觀眾！呢個比喻真係哈哈」

如是者，佢地兩個人一段時間都係咁日對夜傾，逐漸依賴左對方。

而公司既同事都會調侃下佢地兩個，特別係閔哥，呢段時間係洛妍亦言最開心既時光。

(嗯，有你的日子，空氣也開始變甜。)

(續)

第十二章、未踏前，先退後

自從某一日開始，洛妍有段時間心事重重，因為佢搞唔清楚自己對呢個知音有咩既情感，又或者係佢開始想問到底呢個知音仲算唔算係知音？

(做咩成日都咁在意人地有冇上線，在意電話有冇收到人地既message?)

(我點知姐？啱傾姐)

(咪繼續自己呃自己囉)

(邊有呃姐，咁真係唔係又點認啲喂我同唯楓正式分手唔係好耐姐，我邊有會咁快中意其他人?)

(定係你有冇諗過你一早已經唔愛唯楓?)

()

(但我個日明明飲酒為左佢喊嫁啲)

(過左去啦)

(你呃到人都唔到自己我話你聽!)

(我又真係聽唔落去啦)

就係咁洛妍個心一日比一日亂，但就算係咁佢依然係忍唔到想接近亦言。

直至有一日，洛妍係公司既茶水間角落坐暱埋準備食早餐，咁啱洛妍比檯上既隔板遮住左，所以驟眼睇個茶水間冇人。

呢個時候輝爺佢地入左茶水間斟水，咁啱比洛妍偷聽到一段對話：

「喂，你同佢最近行到好埋咁啲，單拖食lunch、一齊返工，咁你地幾時一齊？」

「我都唔知你講咩？邊個佢？」

「咪繼續扮唔知言嫂係邊個囉！」

「」

(聽到呢到洛妍屏住呼吸，只係覺得個心好似跳左出黎咁)

「你知唔知佢依家咩狀態？有冇拍拖？」kai主動問亦言。

「喂，聽講佢一入職有男朋友嫁啲，咁依家？」連洋洋忍唔住插嘴。

「佢依家應該冇拍拖，應該係單身掛」亦言半沉思緊。
(洛妍都唔知佢個刻諗咩)

「喂，咁你仲係到做咩丫？仲唔去馬？」輝爺差啲扯火鬧亦言。

(洛妍差啲忍唔住笑左出聲：哈哈，輝爺好波到)

「唔知你講咩丫，返出去做嘢啦師兄！」

如是者，當佢地離開左茶水間之後，洛妍輕輕伸個頭出個隔板再確認多次佢地係咪真係離開左。

「呼好彩佢地唔知我係到」洛妍又嘆氣。

(我有冇聽錯佢地好似稱呼我做言嫂？)

(啊，呢個稱呼都幾幾親切啲，咪咁激動住先啦！)

(想做咪認囉，收收埋埋做咩)

(你係咪傻？人地有女朋友嫁啦，輝爺佢地講下笑你就當真？)

(如果係真既話就)

(喂，你同我停！)

(咁比人講下笑，可唔可以靜係係公司先做言嫂)

(唔好意思，唔可以！因為現實你唔係、你都唔可以)

(咁到底佢係點諗)

(人地咪答左你囉，人地咪話左唔知佢地講咩丫嘛)

(人地個心得女朋友，唔好一廂情願啦梁洛妍)

(係咁既話佢點解成日夜晚都會打電話比我？點解會成日對住我笑？對我又咁好奇？一時會問我做緊咩，一時見我耐冇覆問我去左邊。)

(人地可能同女朋友嘈完搵你攝時間咋傻妹由頭到尾都係得你一個認真！)

(所以你咪輸了囉)

(冇錯！佢一定係挽緊我)

就係咁洛妍一整日都心事重重、悶悶不樂咁款做野，可能因為心煩緊到底亦言對自己係點，自己對亦言係點。

(咩點姐，咪人地有女朋友囉，要我提幾多次？)

(我知丫)

(知仲諗？知仲望？今日好醒啦)

直到下晝，洛妍一直心不在焉咁行返去茶水間坐低打算透下氣個時，咁啱撞到輝爺，洛妍自然而然咁坐低都係輝爺隔離傾計。

「妍姐，你好似好唔開心喎今日？」輝爺一路路扭開樽蓋一路問。

「我？冇野喎」

「唔似冇野，你平時返工笑口常開，今日冇見過你笑既。」

「有啲心煩姐所以唔開心掛？」

「咁吖言知唔知你唔開心丫？」

洛妍屏住左呼吸三秒，因為聽到一個人名所以佢條件反射左，不自覺勾起左兩邊嘴角，半秒之內洛妍發覺唔對路，改為轉移話題策略。

(希望輝爺睇唔到我既唔自然啦)

「做做咩成日係我面前都會提住徐亦言喎，我地都冇野！」

「嘩！喂洛妍丫，呢到唔係盲人輔導會丫！你係咪當我地盲嫁？你地兩個既幸福樣呢就連飯堂丫姑都知嫁啦！」

「咩喎都唔知你講咩。」洛妍心虛max。

「喂其實呢，我識左佢咁耐啦，我未見過佢對一個女同事係咁嫁。」

「咁係點丫？」

(我想知我有幾與別不同)

「未見過佢會咁樣成日搵一個女同事既面珠，成日返返下工對住個電話傻笑，搞到我地成班男同事都好想知佢同邊個whatsapp得咁開心。仲有丫，佢以前好少笑嫁，但自從識左你之後我哋都覺得佢開朗左唔少，一見到你就笑左先，呢啲你感覺唔到咩？」

「邊係你講既咁姐？人地都唔係中意我！」

「嘩！咁都唔叫中意丫？你知唔知前兩日佢走黎同我講，話見到我同你單獨食lunch覺得好介意好唔開心」

「下？佢親口講既？」
(言下之意姐係徐亦言呷醋啦)

「係！」

「呢個唔會係佢黎既，佢平時有咩都會收收埋埋攤得出黎講一定係好大件事！」洛妍偵探拎起左個隱形放大鏡。

「你都知呢？」

「不過」

「如果姐係我話如果姐，咁言有日肯同佢女朋友分手，咁對你黎講算唔算為左你邁出左一大步？」

洛妍同輝爺下一秒對望笑左。
(我點解會反應唔到嫁?)

「但人地真係冇話中意我嫁！」洛妍回過神來。
(做咩急住否認啫，明明聽到呢到好開心)

(但洛妍你只可以開心一秒，就一秒咁多，聽到未，你知自己唔配、唔應該覺得開心)

諗到呢到洛妍個笑容僵硬左，冇諗過下一句直接令洛妍崩潰。

「其實有女朋友又點啫？係咪先洛妍？」
(靈魂拷問我招架不了)
(我分唔出輝爺係講笑定認真)

但呢一刻洛妍個心沉左，好似跌左落一個無底洞，升都升唔返上黎。

(我都唔知覆咩好)

(佢係咪睇穿左我既心事就係呢樣所以先咁講?)

(我應該點做佢先會唔知我既心意)

洛妍忍住心痛，強顏歡笑咁講：「咪挽啦，我唔係呢種會搶人男朋友既人！」

講完洛妍借意離開，返返埋位工作。

(梁洛妍，你醒下啦！)

叮——

「好忙丫？」

洛妍已讀不想回，最後隔左大半日先回。

「嗯嗯。」

(喂，仲覆黎做咩？)

但之後洛妍都有再點覆亦言既message，因為出自良心對自己既責備佢知道自己唔應該再咁傾落去。

可惜亦言傻傻不知情，唔知洛妍個心已經為佢煩左幾多次，洛妍索性唔覆，想扮唔知。

好唔容易捱到收工，輝爺同亦言咁啱同洛妍同時放工，為左唔比亦言發覺自己既心事，洛妍扮冇事咁同佢地作伴離開公司。

行行下洛妍發覺亦言突然愈行愈快。

「我有野做！」

「誒？哦，有咩做？」洛妍好輕聲咁問。

「約左人」亦言支支吾吾。

「哦」洛妍不以為然，對腳上跟上亦言既時候突然個有身影閃過。

洛妍見到既係一個身高大約一米五七既女仔，帶住一副金絲圓形眼鏡，水汪汪既杏眼眼皮上面係橙粉色眼影，穿着一身黑色連身牛仔褲，比人感覺精靈可愛。

「我唔係叫你去商場等我嫁咩？」亦言眼中好似只有佢。

「唔係約左6點半咩」個個女仔指住自己既手機。

洛妍彷彿已經知眼前呢個女仔既身份，到佢回過頭來既時候，洛妍見到佢地兩個向自己揮手道別遠去。

(死火，電燈膽都有我咁光冇我咁着丫仆街)

(嗯其實佢可以同我講聲先嫁姐，依家兜口兜面撞到，好尷尬)

(但人地見邊個又真係唔洗同我講聲先既)

(係你對人地男朋友有啲感覺先覺得尷尬咋，你睇人地都有野)

(頭先同佢對望左一眼，佢果然幾可愛，似亦言中意個種女仔，我諗我一世都做唔到佢呢種)

(喂，正宮都比你見埋，你仲諗？放唔放手丫？)

(呼好彩)

(好彩我依家喊唔出，如果喊得出姐係中意亦言啦，咁依家喊唔出喎，姐係唔中意啦)

(咁抽身都好易姐係唔係？)

洛妍放左隻係自己心口，好神奇，佢感覺到個心臟係跳動緊，但唔知點解覺得個心好翳，翳到心跳都變得微弱。

(嘶——)

(聽唔聽到有啲聲？)

(係咪心碎聲？)

唔知有冇人知心碎既感覺係點，洛妍覺得呢一刻同自己想像中既心碎好大出入，佢曾經以為心碎係好似一個玻璃杯從檯面被推倒繼而摔破落地，落地一刻先是伴隨一聲巨響，其後只得七零八落既碎片散落一地，拼都拼唔返

但係，呢一刻佢覺得全世界都好似靜止左，唯一聽到既係個心有一下好微弱既崩裂聲，突然個心好似出現左一條裂縫，裂縫跟隨住外圍無聲無息咁擴大，但依然係裂得安靜，直至裂縫愈裂愈深，佢先開始覺得有啲痛感。不過洛妍見到佢個心冇散成碎片，個心反而外型完好無缺因為佢知道散成碎片既心係無辦法令自己堅持生活、無辦法堅持到聽日返工、無辦法返工對住佢。

(暗戀最痛莫過於此)

(知痛未洛妍？痛就放手、痛就走啦)

(我知痛啦比我走啦)

(續)

第十三章、自醉之人何須酒

洛妍打開左whatsapp，分別發送左兩條訊息比兩個人：

「唔好意思東尼主管，我聽日同後日都想請假」

第二句就發送左比一個女仔：

「瑤瑤，今晚出黎食飯啦好唔好，我想人陪」

時隔五分鐘後

叮——

「好，我地都好耐冇見啦BB」

洛妍紅住眼框，默默咁回覆一個心心比瑤瑤，心裏面默念：冇事既冇事既。

瑤瑤係洛妍既閨蜜，二人由小學三年級到依家，之後又再中學同校同班，所以佢地兩個既感情深厚到一個點。瑤瑤失戀以前都係由洛妍陪住，後來大家讀唔同既大學先少左聯絡，但唔影響二人既感情。同時因為大家好忙，好多事都有辦法即時約到對方陪伴，變左大家都係食自己，自己過渡左件事先再同到對方講。

一直都係瑤瑤有唔開心先約，洛妍就算有唔開心都慣左收埋係心到，唔會同人講，直至瑤瑤問起先會講，所以今次瑤瑤覺得有啲唔對路：「洛妍，你係咪？冇冇事」

「掛住你咋，哈哈」（知唔知咩叫強顏歡笑）

七點半尖沙咀既一間西餐廳

「喂BB好耐冇見！點丫點丫，最近點丫？」洛妍唔想自己唔開心既心情影響到瑤瑤。

（你扮冇野都幾叻嫁嗰）

（你想人地睇得出你有野定睇唔出你有野）

「都係咁忙啦，但點忙都要見你既！」

洛妍淺笑左一下：好彩我仲有你安慰下我

「不如我地叫枝酒呢」

「下？你真係好唔開心啲妍」

「？」

「你唔記得咗咩，你以前係從來唔會主動講飲酒，見到可樂先會開心嫁啎！」

「嗯」

「係時候講心事啦！」

「叫左酒先？」

「咁就wine啦！」

「好，我反正都未飲過，你中意啦，我聽你枝笛」洛妍笑左咁講。

「係咪到心事環節？」

「你條友洗唔洗咁好奇？」

「有冇諗過平時分享開個個都係我？我都想聽下野！」

「好啦我我最近好似中意左個同事」

「咁有咩要煩？」

「我同佢無可能嫁啦」

「喂點解咁講？啊佢有老婆？」

「嗯佢有女朋友嫁啦」洛妍比瑤瑤逗笑左一下，一下咁大把。

「哦咁好小事姐」

「下？咁都叫小事？」

「未正式結婚之前，大家都有自由揀既老實講」

「我唔認同，就算未結婚都從來唔係一個理由」講到呢到洛妍捉住個酒杯喊，瑤瑤拍下會背脊，表示心痛。

「咁，妍你離開佢啦！反正你都話冇可能嫁啦」

「我會但我唔捨得因為我覺得佢係我soulmate」

「咁你咪等佢囉，以唔拆散人為前題」

「你知唔知，我一直都唔想醒，但今日我知要醒啦！」

「發生咩事？」

洛妍欲言又止，唔知一時間點同瑤瑤講今日見到既畫面，可能都係因為太震撼，一諗返起個心都已經沉左落無底深淵。

突然之間

叮——

「喂阿，唔好飲啦」唔知徐亦言係咩心情之下講。

「但我今晚想飲丫，反正都叫左就唔好浪費！」

「唔好飲咁多啦，師兄」

「我行到直線嫁」

打完呢句既洛妍若有所思，冇再睇過個電話，而係望住瑤瑤。

「我我見到佢地囉。」洛妍唔敢再補充更多畫面，一舉手就灌左杯紅酒，眼角既淚痕依然沒有變乾。

「啊，呢個男仔我依家未識佢都覺得佢唔好！我依家咩都唔知，靜係知佢搞到你、搞到我最好既朋友唔開心到咁！」

「唔關佢事嫁」洛妍喊到喉嚨都劫，聲線變得沙啞。

「到呢個時刻你都仲要維護佢？」

「我自己單方面中意姐，而被中意既人永遠都唔會有錯嫁嘛」

(原來先動心既人便輸係真嫁)

「你知唔知我見到你咁好心痛？以前唯楓對你既話係溺愛，但你睇下你依家呢個男仔？你為左佢喊左幾多次？喊左幾耐？到依家都仲要唔知揀邊個好咁款！我真係着左！」

「問心我點會唔想佢揀我，但我知如果佢要揀我既話佢一早揀左，所以我知自己係邊個位當然，比個膽我都唔敢拆散佢地！我會放手嫁啦信我！」

「咁佢對你係點嫁？」

「我唔知丫，我覺得佢對我做既野好曖昧！有段時間晚晚打比我煲幾個鐘頭電話粥，雖然我都好眼瞓，但我唔捨得收線。佢又會問東問西咁？見到我都會笑，好似真係笑得好開心個一種，雖然我都係。唉我都唔知丫」洛妍又再舉杯。

「嗯，我覺得個男仔可能都對你有感覺，但未到好中意你」

「所以依家抽身差唔多啦！我要醒啦」

「忘記佢啦BB，以你既條件你絕對可以搵一個再好啲既！」

「？」

「你個樣又唔差，咩都做到，讀書唱歌跳舞工作，你邊樣做得唔好？」

(識左佢十幾年我第一次聽佢讚我，仲要親口讚)

(少少感動)

「我搵左幾份工嫁啦，好想辭職但我好唔捨得，因為佢已經係我返工既動力，我覺得好難搵到另一個佢。你知唔知我每一日都係倒數緊，個種感受得自己先明。」

(每一日好開心好期待咁返工，下晝就開始心急，想要望多佢兩望先走，到放工又要忍住自己唔行出門口望住佢離開，最後要等到佢走左我先敢走，因為我唔敢係佢面前走先，咁到我有一日離辭既話佢個腦會唔會停留左係個日我早走推門既畫面，一世後悔冇機會同我講再見。所以我寧願望住佢走，就算比我見到佢女朋友接佢放工，我遠望佢地都足夠嫁啦，就算個心碎到拼唔返都好，我都夠嫁啦)

「辭職啦好冇？乖啦」

「我都想，但我真係好想每日每日都見到佢！」

「咁，你覺得呢個男仔值唔值得你咁為佢留低？」

「佢唔值得！佢唔值得」

(因為既然佢可以咁樣對我同佢女朋友，姐係話佢真係好衰好衰好衰)

(但係就算係咁，我都)

「妍，你聽我講，(我其實都知你中意佢嫁啦，話晒未見過你喊成咁，以前你分手失戀都未試過咁) 如果你真係中意既，你可以等佢，但你一定要睇左佢對你有冇表示或者行動先。」

「我同意」

「唔好信佢地把口，呢啲男人我見得多」

(瑤瑤拍左十幾次拖但次次都比人hurt，呢方面我唔會唔信佢)

「嗯嗯，我都知我成日比人呃」

「到你辭個時，你睇下佢有冇咩表示！」

「佢點會有咩表示啲」

(但我唔知點解好想好想好想佢有一日會攞住我，係我耳邊講一句叫我唔好走就算係一句就好丫就呢一句我都可以為佢留低)

(梁洛妍你都傻既，拖住另一半去叫另一個女同事留低，一聽都知天理不容！)

(到左呢個地步，我走先係最啱既做法？)

「喺丫，我地兩個要離開爛男人！」

洛妍又比瑤瑤逗笑左。

(不如試下一次下定決心離開啦)

(嗯)

(你咁叻女，一直都咁有毅力，說到做到，今次都一樣！)

(嗯)

(不如離開下有佢既地方試下忘記佢)

「我想聽日去散下心！」洛妍提出。

「好，我聽日放假！」

「約你聽日下晝5點！」

「得！」

洛妍返屋企既路途中有勇氣打開電話通知欄但有勇氣禁入whatsapp睇下某人冇冇在線，佢想某人可以牽掛自己多啲，就算多一秒都好！

(唔好再咁貪戀啦好唔好，唔屬於你既野就唔屬於你嫁啦)

(人地對你唔上心都有計，唔通依家打比佢同佢講話依家散band？人地都覺得你出奇啦)

(因為冇人話想知你幾點返去，飲多定少，冇冇唔舒服)

洛妍又再默默咁熄左個電話，係架的士到合理左對眼。

下晝洛妍既鈴聲響起左，叫醒洛妍既係一把熟悉既低中音。

「喂」洛妍蒙蒙鬆鬆咁回應。

「你個死人頭丫！訓到依家先至醒！」亦言溫柔咁撒嬌。

(大約得我聽得出佢撒嬌係咩聲水)

「啊，頭好痛」

「琴晚幾點返到屋企？飲左好多？」

「咪繼續扮關心囉師兄！」洛妍講笑tone。

(你知唔知你唔可以關心我嫁？)

直至電話另一邊傳黎一陣笑聲。

「冇啊3點幾囉，黑雨嗰夜晚我飲左好少咋」

(明知人地唔可以關心咁你又答人？)

(呢啲咪叫犯賤囉)

「姐係幾多？」

「3杯」

「你個死人頭丫！飲咁多做咩？」

(唔通答話因為你咩)

「冇丫，冇杯係餐廳送既，冇理由唔飲唔比面！」洛妍苦笑。

「人地送比你就一定要飲嫁啦？」

「哈哈」洛妍嘗試以尷尬笑帶過，希望轉移下話題，跟住問起：「喂如果我醉左打比你，你肯唔肯出黎送我返屋企？」

「肯丫！」

(放心，我就算有幾想打都唔敢打，好奇問下姐)

(將心比己，我都唔會想自己男朋友無啦啦被人叫左去接個女同事)

(但唔知點解我琴晚醉左個腦第一個諗起既係徐亦言，如果叫我搵個人送我返去既話第一個都係諗起徐亦言)

(諗姐諗下既話唔犯法既？)

「就算我嘔左落你件衫到你都敢黎？唔會嬲我？」

「唔會嬲你丫！」

(嘩你平時好注重儀表嫁唔 · 咁都唔嬲 ?)

(比個膽我都唔敢嘔落你到)

(不過如果可以既話我想一直醉落去 · 醉左咩都唔洗諗 · 咩都唔洗煩)

(暈暈地既感覺可以令我忘記下自己既唔開心 · 因為呢種迷迷糊糊既感覺可以令我唔洗去諗佢點諗 · 世人點睇)

(只可惜愈醉我就愈掛住佢愈想見到佢)

(點解會咁既 ?)

(傻 · 你唔醉都掛嫁啦)

(明知佢係衰人你咁都掛 ?)

(掛)

(續)

第十四章、散不了的心

「快啲起身啦！」

「嗯係啲，今日約左人散心啲」

「唔好散心啦返工見下我咪幾好」

(我就係唔想見到你對住你自己咁痛苦先要去散心)

(真係好諷刺)

「我唔散唔得丫！」

「點解？咁你唔好散咁耐啦！」

(我都想)

(知你怕少左個人比你攝時間)

(所以我更加要離開下)

「唔覆你住啦，要去挽啦」

「你捉住部電話捉左一日，不時好緊張咁check message」瑤瑤察覺到洛妍全日都心不在焉。

「」洛妍陷入沉默。

「妍，試下一日全日熄左部電話，我地唔好理有冇人搵我地，幾重要既野都放埋一邊先！」

「好！」洛妍點頭後長按關機制5秒。

(呼可能咁樣自己先可以真係透到氣)

(定係你想測試下佢會唔會在乎你？)

(點會，收唔到message 仲好啦，我唔洗煩)

(咁你又係咁睇住電話既通知欄？)

(都唔知你講咩)

「妍，你想食咩？」

「我咩都想食！」洛妍深呼吸左3秒，嘗試從悲傷中抽離。

辣串、車輪餅、可麗餅、雞蛋卷、煎豆腐樣樣都係洛妍最中意食既，呢一刻佢個心有返半點安慰。

(果然唯有美食不可辜負)

(幾唔開心都好都要食野，如果唔係屋企人同朋友會心痛，我個胃都會胃痛！)

「妍，快啲睇下，你至愛！」瑤瑤打斷左洛妍既進食，指向遠處。

下一秒洛妍已經跑去瑤瑤手指既方向，眼見人牆圍起左一間鋪，當洛妍愈跑愈近個時，聽到愈趨強烈既音樂，洛妍穿過人牆先知原來咁多人圍觀既都係睇緊一個男仔玩緊部跳舞機。

個個男仔身穿一身白tee、黑長褲，戴住黑色口罩、黑色cap帽。佢揀左一首k-pop歌跳，係seventeen既hot，洛妍瞬間比佢吸引住，除左因為佢揀左洛妍中意既團體曲目之外，洛妍不嬲都欣賞識跳舞既男仔

(一定有話題嘛^-^)

(同埋跳舞既男仔一定同自己一樣，會好勤力練習)

相比起瑤瑤對跳舞同跳舞機既興趣冇洛妍咁大，所以瑤瑤陪左洛妍坐低睇左一陣就提出想自己去行街。

「你自己ok嗎BB？」

「梗係得啦，係你自己行街得唔得丫？」

「梗係得啦，不知幾中意自己行，哈哈，好過係到望望望，冇份玩！」

「喂，你知你阻住我睇靚仔嫁啦！快啲走快啲走！買得開心啲！」洛妍揚起手。

「嗯，記得出去獻醜之前叫我返黎錄，哈哈」

洛妍一坐就坐左兩三個鐘，冇離開過個座位，對眼都冇休息過，一直望個個男仔玩跳舞機，但個心同個腦都唔係呢個男仔既身上

(呢個男仔跳得幾好啱！身體素質幾好，無論係wave 定isolation 都做得好好睇，唔知佢練左舞幾耐？)

(如果部機有breaking 既歌曲就好)

(咁既話我就可以同佢玩，唔知同佢玩係會點呢？)

(佢一定會話：咪繼續跳錯囉師兄)

(等等先，邊個佢？)

(你想話出面個個男仔定係你心入面個個男仔？)

() 洛妍垂低眼簾。

洛妍就算可以欺瞞瑤瑤話自己放低左但都欺騙唔到自己，因為佢好清楚自己每分每秒就算唔望住個電話都好，個腦同個心都諗住同一個人。

(心入面有一個牽掛既人既話，係咪去邊都好都會見到佢既身影)

(到底點先可以逃離有佢既世界？)

(咁既話，我又要逃幾耐？)

(續)

第十五章、Fly me to the moon

三個鐘後，洛妍突然向外望一望天色，發覺自己真係忘記左一個人，係瑤瑤丫仆街！呢個時候洛妍先記得要開返電話聯絡瑤瑤。

可惜洛妍一開電話見唔到某人既message
不禁又再失落。

(係咪呢？叫你咪搞咁多嫁啦，你睇你依家似咩樣？)

(我都冇在意完全冇！)

(咁你又點解釋自己既失落)

(因為誼？我點解要解釋？！)

洛妍提醒返自己做左緊要野先！於是打返比瑤瑤。

「你行左去邊呢美女？」

「係H&M排緊隊比錢丫，嘩多人到呢」

「嚇死我啦，一行你就行左3個鐘，就嚟幫你報名參加三項鐵人，唔係講笑！」

「夠你恐怖？一坐坐3個鐘，都唔知有咩好睇，你都傻傻地既喂一陣食咩？」瑤瑤忍唔住調侃下洛妍。

「你揀啦好冇？我今日唔想用腦！」

「好好好，我一陣先黎搵你我買埋野飲先，你坐埋一邊等我丫」

「嗯嗯」

洛妍行出機舖，係街邊搵左一個位坐低等瑤瑤，呢個時候竟然傳來一陣熟悉既電話鈴聲

(又係呢個名終於係呢個名)

(聽唔聽好？)

(你都等左一日，唔係為呢一刻咩？)

(問心，你唔開心咩？)

(不如就順從自己既心一次啦)

「喂！你去左邊？」洛妍耳邊傳來左一把好熟悉既聲線，洛妍瞬間紅左眼框，因為呢把聲安慰到今日

苦苦硬撐既洛妍，可惜佢只可以聽到把聲，擁抱唔到呢把聲。

「我我咪話左去散心囉」

「去邊到散散咁耐？」

「唔話你知喂！你唔知頭先我見住個男仔玩跳舞機，好勁、好charm！佢跳得幾好嫁，我一睇就睇左3個鐘！」洛妍嘗試轉移話題。

「你咪繼續睇其他男仔囉」

(好似有啲酸佢係唔係呷醋？)

(我再試探下先？)

「哈哈你仲想問人地拎聯絡方法嫁，你知啦人地帶晒口罩咁有神秘感，唔問唔得啦！」

「哼！zzzzz」亦言發出左一聲悶聲後開始扮訓覺。

(咪繼續扮聽唔到囉)

(做咩咁想人地呷醋？)

(我想睇睇下佢呷醋個樣姐)

(想睇人地呷醋就假既，想睇人在唔在乎你就係真既)

(你咁講法，我唔認唔得啦)

「哈哈喂！咪訓住先啦！做咩打比我？」洛妍尷尬笑左。

「冇丫，想睇下你做緊咩囉？」

「我等緊人丫！約左人但佢未到，我咪坐左係街邊等囉。」

洛妍同亦言如是者閒聊左半個鐘。

「喂！你知唔知丫？今日月亮好靚！」

「係咩？但我呢到抬高頭睇唔到月亮丫！不如你影你個邊個月亮黎睇下」

(如果可以既話我都想去睇下你睇到既月亮，但係係同你一齊睇你睇到既月亮)

(肩並肩咁睇)

(手牽手咁睇)

(仲有)

「你個邊冇太可惜啦！」

「嗯嗯，但今日都唔係滿月，都靚咩？」

「係丫！」

「哦，係呢，做咩無啦啦講月亮既？」

「冇丫我想轉下個話題咋」

「哦哈哈，咁你又轉得幾快幾成功啫！」洛妍大笑但依然不解，不過佢冇再問落去。

洛妍突然見到遠處拎住一袋二袋既身影向佢揮手：「啊，佢到啦，我收線先啦喔」

「嗯。」亦言等洛妍禁結束通話個制。

(如果可以一齊飛上去個月球到，靜係得我地、得我同你就好)

(續)

第十六章、我的END大人來襲

七點半

洛妍出左門返工，但佢搭車既時候舉起左部電話，隔三秒又放返低，呢套動作大約重複左4-5次。

(好唔好打比佢問佢起左身未？)

(散完心應該知要放低既)

(都係既)

最終洛妍係舉起電話第6次前成功阻止自己打比亦言。

八點半

洛妍坐係自己位，準備開電腦工作，呢一切看似簡單平常既流程，今日有啲唔同，可能因為冇打電話、冇一齊行返公司，洛妍總覺得今日個心好似一個完整既拼圖少左一塊咁，但又未至於好難過，總覺得奇奇怪怪咁，反正佢形容唔到個種感覺。不過佢唯一知既係，由搭車到行返公司，直到依家返埋位，佢個心都跳得好快。

「喂！」亦言主動走近洛妍個位打招呼。

「？」洛妍一拎轉頭就見到琴日佢好掛住既面容。

「做咩朝早唔覆我？以為你唔返工！」

洛妍用好佻皮既語氣係亦言耳邊講左句：「surprise？」企圖掩飾自己既唔自然同反常表情。

(知唔知，我有幾大力禁住自己唔去搵你？)

(係估唔到自己原來都幾大力下)

(但太大力有時又會後勁不繼地失手)

(而一失手就會禁唔住自己，禁唔住自己就容許左自己覆你好多個最後一次)

(可惜呢啲你都唔會知)

(因為你眼見既係我返工個時同其他同事仲有講有笑，眼見既係我唔知點解對你好似忽冷忽熱咁)

(你唔會感受到我個心每一日都係來回地獄又折返人間咁)

(我個心每一分一秒都係掙扎緊，我既理智同欲望每日點樣重複拉扯，我既理性同感性都係因為你而失去左準則同標準)

(原來我個心不知不覺已經做到去呢個地步)

(我發現我個心愈黎愈唔肯聽我話)

「妍姐，一陣一齊食飯啦」輝爺係茶水間撞到啱啱入黎飲水既洛妍。

洛妍遲疑左幾秒：「好吧。」

(如果我唔去，大家會唔會察覺出我既異樣，繼而估到我既心事？)

(唉，頂硬上啦唯有)

如是者，佢地成班後生仔一齊食lunch，亦言揀坐左係洛妍既隔離，而坐洛妍既對面係迪仔。

平時迪仔同洛妍冇咩兩句，直至今餐輝爺主動提出話題：一次最深刻且難忘既追女仔經驗，兩人開始展開左一次正式又正常既同事對話。

「我中學試過聽到個女仔咳左兩聲咋，我飯都唔食就跑去7仔買京都念慈菴放係佢櫃桶到」迪仔好正經咁憶述往事。

「嘩，睇唔出你咁貼心啲迪仔！」

「仲有一次丫我試過拼左一盒全部都係佢中意食既朱古力比佢，仲親手整左個新包裝，個包裝好特別好靚嫁！」迪仔show左張相比洛妍睇。

「係啲不過以買禮物黎計，你地都唔夠我以前男朋友咁叻豬」

呢句令眾人都感到好奇。

洛妍繼續解話：「佢去旅行呢唔知我中意邊枝唇膏但又唔想問我，想比個驚喜我，結果佢睇最多人買既買比我」

「車，都冇啲心思既」迪仔悔氣咁話。

(可能因為我冇讚佢？所以佢悔氣左掛，哈哈)

成餐飯亦言都好少搭話，洛妍都唔敢主動問佢為女朋友做過啲咩，係因為佢唔想自己聽完會唔開心。

直到大家食完飯一齊行返公司等lift之際，三人又還原返食飯個位置咁，迪仔係洛妍對面，亦言係迪仔隔離。

迪仔係呢個時候似乎想逗趣下洛妍，慢慢行近洛妍又一直注視住佢，迪仔既眼神同視線都令洛妍唔舒服，特別係迪仔愈行愈近、愈貼愈埋，洛妍下意識退後，但絲毫冇令迪仔停止呢個行為。

「做咩嗰迪仔望住我做咩」

「」迪仔依舊一聲不吭。

(佢做咩望住我，望到眼都唔眨)

(佢想點嗰)

(唔係想錫我丫嘛？)

(我好驚丫媽咪)

洛妍再次下意識扯左一扯亦言衫袖衣角，耷低頭就睇埋左去亦言既背後，但因為空間不足，所以洛妍事實上只睇埋左係亦言既手臂後面。

(人地話一個女仔如果受驚既時候下意識躲係一個男仔既背後既話，咁代表左個女仔認為呢個男仔比到安全感自己，所以先會躲係佢背後)

五秒後，洛妍只係見到一隻手伸左出黎，快速咁遮住左迪仔對眼。洛妍都未黎得切反應就笑到見牙唔見眼。

原來係徐亦言伸左隻手遮住迪仔對眼，洛妍就係呢一刻感覺到個心臟漏左唔止一拍。

(佢係咪保護緊我？)

(點解我會咁開心既)

(被保護既感覺真係好)

(原來比佢保護既感覺係咁美好)

(因為我太耐冇比人保護過，我真係好依戀呢種感覺)

洛妍個一刻知道左原來心動是長什麼模樣，就係當亦言伸手想去保護自己既時候，洛妍只係見到佢同自己中意個個動漫男主角納茲既身影慢慢重疊，最後同化。

(嘩，佢真係好man)

(同納茲大人一樣咁man！)

(唔係係超越納茲大人先啱！)

(佢原來咁有男友力！)

(因為佢平時好沉忍，咩都係得個諗字，唔會做到咁出面)

(頭先紅住對耳咁伸左隻手出黎)

(好可愛)

或者令洛妍最心動既係——唔會理任何事都要堅持去保護一個人既決心，唔理任何事都有呢一份想保護一個人既衝動。呢樣往往都係令洛妍最動容既野。

(佢係咪出於呷醋先遮住迪仔對眼？)

(佢之前同我提過話見到我同輝爺佢地傾計傾得好開心而有啲唔開心，我問佢點解答我話唔知丫，可能因為自己本身覺得同我最熟，而唔想有人會同我熟過我同佢)

(咁叫唔叫呷醋？)

(唉，我都唔知丫)

終於捱到架lift到左，洛妍以為終於可以甩難之際，迪仔罷脫左亦言之後又再黎過，又重複成套動作。

但係今次洛妍入左lift之後已經冇路可退，洛妍都唔敢望亦言多一望，唔知點解佢直覺覺得亦言好似好不爽，至於點解怕見到亦言不爽既原因連洛妍至今都未解答到。

所以洛妍面對住迪仔嘅騷擾性凝視，唯一可以做啲既係不斷迴避佢既視線，但洛妍唔知既係亦言一直都係到望住迪仔同自己。

或者其實洛妍係知亦言一直望住迪仔同自己但佢唔敢望多一眼亦言，因為佢知亦言生氣了。

(唔知望多一眼亦言佢會唔會更加嬲？)

(佢有咩可以嬲你先？)

(我唔知丫，我靜係feel到有啲殺氣咁款啦)

(我好驚丫媽咪我想返屋企)

終於到左4樓，一出lift迪仔就冇再望洛妍，專心向前行，洛妍鬆左唔知幾多口氣。

(呢程lift真係好漫長，長過marvel end game 4)

(唔知佢頭先諗咩呢？)

(如果佢真係為我呷醋，咁又代表住啲咩呢？)

(續)

第十七章、醋王與妒后

今日，命運之神收緊左洛妍同亦言之間既命運繩索，再輕力一拉，兩人失去平衡而向前踏進左一步，直至兩人看清楚對方既五官。

十一點半

洛妍啱啱洗完頭、沖好涼行出浴室既時候收到亦言既night call，今次洛妍冇一秒猶疑之下接聽左，因為佢發覺佢今日有千言萬語想表達。

「喂？」

「先唔好講呢啲野住，我有好重要既事同你講」洛妍好心急咁打斷亦言下句說話。

「咁啱既？我都係」

「你唔會夠我既重要！」

亦言妥協了，應該又係一副「真拿你沒有辦法」既表情。

「我梁洛妍，依家好鄭重咁多謝你、多謝鏡鏡你，今日救左我！我唔知點去答謝你！」洛妍把聲輕微顫抖。

「哼！」

「你唔開心？」

「你丫！你個死人頭丫！自己唔中意人地望住你又唔開口講，最後要我出手，撈死人啦！」

「咁我當下真係反應唔到，個腦空白一片丫！」

「哼！」

「哈哈」洛妍忍唔住大笑。

「你笑咩？」

「唔得！太好笑！太可愛！」洛妍諗返起今日亦言遮住迪仔對眼既畫面，由個心到甜到笑左出嚟。

「喂！同你忘記左佢！」

「唔要！哈哈」

「好羞恥丫！」

「我會一世記住、一世都記得今日」

(記得呢個男仔曾經點樣保護過我、點令我心動)

(記得呢個男仔對耳紅成點)

(記得呢個男仔伸左邊隻手)

(記得呢個男仔隻手舉幾高)

(呢一刻我會永遠收藏係自己既腦內相簿)

「係呢你又點解會伸隻手出黎既？哈哈個個係你識左十三年既好兄弟黎嫁嗰！唔怕得罪佢？」

「冇丫鬼叫醋醒倒瀉左咩」亦言應該又係紅住耳講呢句。

跟住聽完又到洛妍面紅。

「我係到諗，如果我地公司係100樓，你係咪打算比佢望到100樓？」亦言突然換左種好嚴肅既態度。

洛妍一時答唔出

久良，洛妍再次開口：「我我都唔知丫。咁人地要望我我都有辦法，我只可以避，當時我真係反應唔到。」

「姐係如果下次發生同類事情，你都係咁處理？」

「嗯咁你嬲我定佢？」

「我唔會嬲望個個囉如果係咁，我會嬲比機會佢望個個！」

「但明明我都唔想嫁嘛」

「咁你要開口講！開口同人講你唔中意！叫佢停，唔好再咁望住我咁講！」

(我第一次聽到佢咁認真嚴肅同我講野)

「點解嗰你都幫我遮左啦，唔係解決左咩？」

「因為我代左你做，如果你唔係咁諗，咪變左係我衝左出黎囉，咁佢都可以乘機話我唔可以代表你既立場。」

(傻，你不知幾型幾man，點會係衝出黎？)

(我就係想你代表我立場，得唔得？)

「我當時真係反應唔到，你信我好唔好！」洛妍真誠到一個點。

(我當然唔中意迪仔咁做啦)

(但如果唔係佢既話，我諗我一世都唔知你對住我係有咩感覺)

「我下次唔會啦」洛妍小貓企圖舔一下利爪賣萌。

「咁你下次會點做話？」

「我會同佢講話我唔中意佢咁做」

「嗯」

「唔好嬲啦我以後唔敢啦」洛妍小貓用奶音講企圖再次融化左主人既心。

「我有嬲」

(嘩你語氣悔氣到呢！)

(做咩氣氛咁凝重姐)

(搞咩搞咩？呢個電話，真係唔知既人都會以為係情侶既phone call，個男朋友打黎話個女朋友今日唔乖，打黎話自己呷醋，打黎話要女朋友氹返自己，打黎要女朋友make a promise)

(明明我地都唔係一齊)

(咁佢咁在意我下次點處理做咩？)

(但我未聽過佢用呢種語氣同我講野好凝重好嚴肅好惡咁)

(佢嬲我？嬲我唔識保護自己？)

(但如果可以，我都想比你一直保護落去)

「鏡鏡，同你分享下啲野」洛妍一搵到機會就轉移話題，想打破一下僵局。

「咩丫」亦言可能仲嬲緊所以有聲沒氣咁應。

「我呢，之前咪去左camp既，同一個男仔做partner跳舞，嘩隻舞好性感如果你有份係到睇，我一定會拉你坐握手位！」洛妍忍唔住笑意。

「梗係唔會有機會睇到啦我，我一睇到就即刻走先啦一定，完全睇唔落去！」

(係咪眼火爆？哈哈！)

「點解丫？」

「第一我又冇份睇，第二你係咁多男仔面前跳唔係得我睇，第三，最重要係，你又唔係同我一齊跳！」亦言激動左。

(嘩！咁都唔叫呷醋？)

(人地冇話呷醋啲！)

(但你咁都聽唔出咩？)

(噃我唔肯定，但似乎酸得黎都幾甜)

洛妍已經控制唔到嘴角，只係覺得個心好甜好甜好甜

(放心，我都靜係想同你跳，靜係想跳比你睇)

叮——

「洛妍，你依家返緊咩工丫？」

洛妍手機收到一條來自佢中學同學Mandy既message，洛妍不以為然就係同亦言傾緊電話個時回覆左佢。

「我做緊officer」

「哦，我想問下你呢，你公司請唔請人丫？我想過去做下part-time，識下男仔咁！」

洛妍望左一望主管東尼今朝sd比佢既招聘告示一眼之後

「冇丫，我地公司夠人啦！」

(壞女人梁洛妍)

(但同時又會係一個幾可愛既女朋友)

(續)

第十八章、二選一

「咳咳咳」洛妍自從去完camp冇幾耐就病左，因為佢日曬雨淋，休息時間好少所以佢一返黎就感冒。

洛妍一訓醒就向主管東尼whatsapp請假，因為佢覺得自己今日特別唔舒服。

「唔好意思丫東尼，我想請病請一日，醫生紙後補！」

「OK！」

叮——

洛妍對話框多左幾條訊息：

輝爺：「洛妍姐姐今日報左假咩？」

Sing哥：「今日唔返？」

亦言：「對唔住丫，今晚明知你唔舒服都捉住你傾電話，唔比你早啲瞓」

洛妍睇到最後個條message 又好唔爭氣咁笑左出黎。

(點會怪你)

(鬼咩因為我都唔想訓)

(我揀左繼續同你傾既話我自己都要負責任既)

叮——

「你今日會去睇醫生？」亦言再問多次。

「嗯。晏啲！」

洛妍覆完就熄電話訓多一陣，直至4點起身出發睇醫生。

直到夜晚某人又再打左個night call，叫醒左休息緊既洛妍。

「喂」洛妍頂住睡意起身聽電話。

「你點丫？啱啱訓緊？」

「恩。」

「今日醫生點講？」

(你突如其來嘅關心，有啲嚇到我，因為我好耐冇比人關心過啦)

「感冒丫，叫我休息多啲咁囉，我叫左唔好開有睡意既藥，但佢有一隻都係有。」

「咁我唔阻你訓啦」

「唔好啦我都醒左啦」洛妍輕揉眼睛：「你唔好扮關心啦師兄！」

(你知唔知你唔可以關心我)

「我邊有扮」

「咁你呢份關心，你係以同事既身份定係以朋友身份問？」洛妍屏住呼吸。

「我諗呢兩種身份都唔係。」

(你終於肯承認啦咩)

「咁你知唔知自己做緊啲咩？你可以咁樣嫁咩？」

「我知自己做緊咩！」

「唔好意思你唔知，如果你係知你唔會咁你有女朋友嫁，你醒未？」

「但我有啲嘢想同你講。」亦言好正經好認真咁講。

「」

「早兩日，你同輝爺食飯，你咪擔遮遮佢既我其實」

「？」

「我其實好介意好唔開心，但眼見你好似都唔發覺我有唔開心，我就係到諗，如果連你都唔知我唔開心，你都唔會主動氹返我既話咁黠黎都好似冇意義」

(我點會感覺唔到你唔開心？)

(但與其話你係唔開心，我更多既係覺得你陰陽怪氣)

(點解你呷醋都唔可以直接認？)

(呷醋好失禮咩？)

(你地男仔唔想估我地女仔話冇野係點解，其實調返轉頭我地女仔都係嫁)

「等等先，𦉳？你話你𦉳我？你同我講個𦉳字？」洛妍愈黎愈扯火。

「噃不過你唔𦉳我我都有野，過一陣都有野嫁啦！」亦言平淡咁答。

(睇黎你真係買棺材唔知錠！)

(其實你有咩資格呷醋？你一腳踏緊兩船嗰，仲想我𦉳返你？真係好諷刺好荒謬！)

「呵！我真係好傻！傻到貼地！你知唔知最近有兩間學校打比我叫我去見工in我夢想職業，叫我做老師，我兩次都推左就係因為想留係到對多你一陣我真係好傻好傻好傻。」

(有老師都唔做，但我得到一個點樣既對待？)

(就係一拖二，比唔到身份我之餘仲要𦉳我呷我醋，仲妄想我會𦉳返你？)

(依家講到好似係我做錯野要𦉳返你咁)

(我到底算係咩？)

(你憑咩咁樣對我)

「對唔住丫對唔住丫」

「你講到係我唔知你既唔開心，所以你依家要委屈自己主動打比我同我講自己𦉳咁。OK，你想我知你既唔開心，咁我呢？」

「對唔住丫對唔住丫」

「依家講對唔住又有咩用！你根本係挽我！」

「唔係！」

「唔係既話你點會咁對我？你知唔知我有幾委屈？點要我一個人承受晒所有閒言閒語？」洛妍聲線已經沙啞。

「我其實打算一世都唔會同你講我中意左你呢個秘密」

「」洛妍既淚痕開始加深。

「我依家講都係想捍衛下自己，因為我想講，我就算處理得唔好，但唔等於我對你唔認真或者唔係真心！」

「如果你係認真既點會咁？」

「你可唔可以比啲時間我？」

「我唔想等你啦，我好叻，本身我都同你一樣，打算一世都唔同你講我既心意，亦都唔打算同你講為你犧牲左啲咩，但我頭先實在太嬾啦」

(因為我知過左咁耐，你有心做早做左，洗咩等依家？)

(我比你既你時間仲唔夠多啦咩？)

(講緊唔係兩日嗰係已經兩三個月啦)

(知唔知累積既心淡係點？)

(咁你仲想我無了期等你幾耐？)

「你唔好咁啦」

「我太清楚你啦以你既性格，你又點會主動同佢講分手？係我傻姐，明知結果係咁都仲甘心付出」

(呢樣都係我最痛恨自己既野)

(我中意你既善良，但同時痛恨你既自私)

(我中意你既為人念舊，但同時痛恨你既遲疑不決)

(我中意你既反差萌，但同時痛恨你既極端)

(我中意你係個會係重要關頭為朋友同中意既人挺身而出，但同時痛恨你平日你既敢怒不敢言)

「你真係想話比我聽你係認真既，你用行動去證明比我睇啦。」洛妍講完就收左線，好好沉殿下自己。

(你點夠一個一齊左5年既另一半比較？)

(人地經歷左咁多野)

(好，打定輸數啦梁洛妍！)

(冇期望就唔會失望)

(續)

第十九章、情與義

早在半個月前，唯楓想見洛妍最後一面，所以約左佢出黎。

「你，你唔可以離開我！」唯楓係街到同洛妍講。

「我知你好愛我好中意我，你為我做左幾多野我都好清楚，但你知」

「我唔知！」

「但我為左比安全感你，我忍左五年啦！我忍左足足五年唔敢去參加舞蹈學會，因為我知你怕我去一個新地方新環境又會有人想追我，但我忍夠啦」洛妍開始歇斯底里。

「你自己知你自己有幾危險嫁啦你樣好、性格好、讀書好、樣樣好，我都會自卑覺得襯你唔起，擔心有人好過我，條件好過我你就會走！加上你不矚中意識跳舞既男仔，我唔識，所以如果你入左去，我留唔住你個人同個心！」

「」洛妍沉默左好耐。

「你自己都唔可以向我保證唔會對其他人心動啦！」

「我唔想作呢啲冇意義既promise，氹得一時三刻既promise 有意思咩？」

「你睇你就連氹下我都唔肯！」

洛妍面前唯楓既質問仍舊係默不作聲。

「我只係唔想萬一到時我做唔到既話你會難過」

「that' s why I request for a promise」

「」

唯楓突然攬住洛妍，用哭腔求洛妍：「你唔好走冇左你，我唔識照顧自己、我唔識做功課、我唔識面對壓力」

「你知我點解要走。」

「係咪我比你去跳舞，你就留低，返黎我身邊？」

「唔係」洛妍搖搖頭嘆息。

「係咪因為個個男仔，你公司個個？」

「」

「望住我對眼，答我！」

洛妍望向一對通紅既眼框，堅定咁答：「唔係！」

「咁你辭職啊！」

「」

「咁你都仲唔認？」

「我」

「你知唔知，你每一次既猶疑、第一秒既沉默都已經係答案？」

「」

(我對住你，永遠都係得口啞啞既份，因為得你睇得穿我)

「8年啦，我會唔知你諗咩？」

「」洛妍既眼淚已經一次又一次咁滑過面頰。

「個日我入左醫院，你係有黎陪住我，因為你知我想見到你，因為你知你係到我先會安心。但你坐喺我隔離你估我睇唔到你個心已經一早唔係到啦咩？你係咪當我盲？我行開左去廁所咋你都捉到部電話實一實，你知唔知我有幾記得，我同你當年一齊冇幾耐，你連message都唔睇，甚至可以一日都唔開電話唔聽我電話」

「我同佢只係同事」

「呃到我咩你？就憑你？我有幾了解你你點會唔知！」

「我講事實，真係同事！我同佢冇一齊」洛妍講下講下就垂低左個頭，呢一刻佢望到唯楓手腕上有一條好淺好淺既疤痕，呢條疤痕又再刺痛左洛妍既心同對眼。

「我唔會同佢一齊嫁我唔敢再傷你既心」洛妍眼神開始變得空洞。

(呢條疤痕係我對你既虧欠)

(我用一世都唔知償唔償還到？)

記得有一年，洛妍向唯楓提左一次分手，唯楓當下好大打擊，為左洛妍去做傻事想挽留洛妍

「我知你個心裝左佢你唔洗唔認！」

「」

「比個機會我追返你啦好唔好？」唯楓想掙扎多次。

「 」

唯楓冷靜左一陣，佢突然捉住洛妍，輕輕錫左洛妍額頭一下。

「我雖然好想好想好想留低你，但我唔可以阻止你奔向一個比我更加好既人，因為我真係好愛你」

「 」

「依家，我還你自由」

「唔好唔好丫！」洛妍想捉住唯楓隻手，但佢對腳邁唔出多一步去追上唯楓。

(你曾經係好似我親人既存在)

(我已經好心痛你)

(還左自由比我，咁你以後會點?)

(我以後會點?冇你管住我我一定會出事)

(呢8年既回憶好似就係呢一個比人強制刪除左咁，我打開唔返呢個空白file)

(我最怕既係歷史重演)

(我可唔可以求下你，唔好傷害自己)

(因為我已經唔知內疚左幾耐)

但身體真係好誠實，因為由洛妍邁唔出半步去追唯楓既個一刻，佢先知原來自己由唔知幾時開始留低係唯楓身邊係為左一份責任、一份救贖。

洛妍知道唯楓有幾愛自己，咁多年黎，嘈交永遠願意第一個低頭打電話比洛妍先，帶洛妍識晒身邊既人，就算鬧洛妍既說話有幾難聽都只係想為左佢好想佢變好、曾經奮不顧身咁救一個差啲扑中洛妍既馬鞍而拗柴但毫無半句怨言、曾經比屋企人逼住出國讀書既唯楓明明都上左飛機但為左洛妍竟然跑左落機反抗佢屋企人、曾經為左同洛妍同班讀書而揀左自己最冇興趣既科目亦都成功次次考唔合格返黎就係為左想見多啲洛妍、風雨不改咁送洛妍返屋企咁多年就算洛妍唔係同自己出街都好都肯即刻出黎、洛妍有咩大件事發生永遠第一句聽到既係：你有冇事我依家過嚟、做咩都好都第一時間諗起洛妍、擔心洛妍，對住又傻又懵既洛妍永遠都肯比耐性佢，例如就算洛妍返工出去唔識路佢都會預早一日教定洛妍點行，就算當刻洛妍蕩失路都會衝出黎搵佢、同洛妍一齊食飯出街(就算係唔係聚餐都好)永遠都係比洛妍食第一啖同最後一啖、上落車永遠都會自己行先再轉身扶洛妍、眼見洛妍拎起左手幾次唔捨得買既迪迪尼頭箍都會扮去廁所轉個頭跑去買比洛妍，想比日常裏既一點驚喜佢、又會去完旅行一落機就衝左去搵洛妍，話比洛妍聽自己有幾掛住佢，洛妍永遠都係唯一既理由令唯楓拒絕所以自己既追求者。

(你知唔知曾經有人咁樣愛你?)

(我知)

(只有當我離開左佢，或者遇到另一個人既時候我先知佢到底幾愛我)

(你係咪唔應該將佢同其他人比較？)

(唔係，正正係因為咁，我先會分辨到邊個對我係真心)

(我曾經係咁樣比人捧係手心寵愛，如今我要低聲下氣求人拎一份愛？我做唔到)

(唯楓係一個指標，一個愛洛妍要有既指標)

(你傻啦，邊有人做到唯楓呢種級數更何況你唔怕唯楓又做傻事咩？)

(我怕丫)

(但我已經返唔到去佢身邊啦)

(你試吓啦，冇人對你好得過佢對你)

(佢對我有恩有義，但)

(你既情已經)

()

(如果係你，情同義你點揀？)

(續)

第二十章、與自己的對賭

與亦言通完電話既翌日

洛妍「如常」返工、「如常」唔洗期待某人message

、「如常」唔洗打電話叫人起身、「如常」唔洗等人一齊行返公司，真係有夠「正常」。

但正當洛妍打算過馬路之際，佢突然餘眼望到個個黑白格仔既斜咩袋、啡紅色髮色既身影

「唉又會咁咁既，真係唔好彩」洛妍今日反而冇平日見到亦言既個種開心

(因為我想用盡力避開你嘛)

(只要我避開你，事情先可以回歸原點)

(依家大家都知道左對方既心意，但)

「喂喂，睇車丫！」亦言突然叫住左心不在焉過馬路既洛妍。

「冇事既」洛妍心事重重個死樣咁答。

「如果我冇叫住你，你會點？」

「咁你想我點報答你？」

「咁又唔洗」

(車)

(比隻好牌你都唔識上)

(蠢到死！)

不知不覺亦言同洛妍企埋左一齊等lift搭lift，洛妍望住亦言、望對亦言對眼

(望多一眼就放低啦)

(點解？)

(因為人地唔揀你囉)

就係呢個時候亦言都望住左洛妍，微微一笑。

(點解佢可以當咩事都冇發生過咁既？)

(點解佢好似唔記得左同我講過對係我認真？)

(點解佢依家見到我仲笑得出？)

(原來小丑竟是我自己)

(由頭到尾都係得我難過、得我患得患失)

(佢依家笑我出姐係)

(我成功比人拋底左啦)

(好野！事情終於回歸原點)

(但點解我依家個心，好似穿左窿咁既？咁空虛咁空洞咁既？)

(你好放低啦喎！)

返到公司既洛妍趁空檔既時間拉住左行過既輝爺。

「輝爺，今日同我食飯！我有心事同你傾！」

「嘩喂，好！」輝爺好爽快咁答應左。

直到放飯既時候，成班人都行同一條路洛妍故意為輝爺遮太陽，因為佢知身後既亦言一定會睇到呢一幕。

(做咩姐你？又想人呷醋？)

(一半一半啦)

(唔知佢仲在唔在意我)

(但人地呷又點唔呷又點？就算呷都唔揀你丫！)

(有道理！)

(呷左你要開心定唔開心好呢？)

(開心佢仲在意我，唔開心佢仲係咁既態度)

(唔好再去試探佢啦，因為受傷個個永遠得你嫁咋梁洛妍)

(咁我應該？)

「妍姐，叫左食咩先啦」

原來洛妍同輝爺已經不知不覺行到去餐廳坐低左。

「無所謂啦就A餐啦。」

「咦丫言同迪仔都係到嗰！」輝爺指向洛妍既背後。

(唔係掛)

(好機會丫飛雲)

(咩好機會？)

(快啲同輝爺傾得開心啲啦！大笑啦！)

(我點解要咁做呢？)

(報仇啦、反擊啦！天蠍座)

(佢令你咁唔開心你唔係仲顧慮佢感受丫嘛？)

(但佢會唔會呷醋呷到死？佢真係會好呷好嬲嫁)

(我叫你反擊丫！)

洛妍遲疑左半秒之後開口：「輝爺丫！點樣可以快速放低一個人？」

「搵過另一個同埋交比時間！」

「有道理！咁我應該點做好？」

「搵過另一個！」

「好！我聽你話！」

(既然我揀唔到，我比你幫我揀)

(你好彩，我真係識左幾個男仔！)

(不如試下沉下其他人)

(可能會忘記到徐亦言呢)

(得咩你？)

(試下？)

「輝爺最近係學校識到一個男仔，佢係我既主席黎既最近同佢即興去練舞食飯，覺得佢個人幾好！」

「嘩！咁有效率，過搵另一個真係即刻有另一個，哈哈！」輝爺笑左出聲。

洛妍都跟住「大笑」！

(最好成間餐廳都聽到我有幾「開心」！)

「不過主席對我有興趣呢」

「點解咁講？」

「因為我同佢得公事上既交流！你估你有冇方法令佢快速沉我？」

「噏，你有冇同佢既共好興趣？」

「有，咪跳舞囉」

「咁你可以」輝爺繼續比建議，但洛妍根本冇再留心聽落去。

(「快速」沉我？)

(愈快愈好？)

(盲既都知你想點啦！)

(唔知輝爺明唔明我？)

(梁洛妍，其實你有時幾傻)

下晝三點

洛妍拎住個水樽係茶水間斟水，又咁啱偶遇輝爺去locker拎野。

「喂！洛妍！重要情報！」輝爺揮手叫洛妍行近自己。

「咩事咁呢？輝爺」洛妍好奇小寶在線中。

「喂！丫言可能會同佢女朋友分手！」

「下！」

「我講堅既！」

(我一定係發緊夢！清醒下梁洛妍！)

「點會？你係咪傻？」

「我覺得佢最近搖動左！」

「佢點會係講分手既人？諗都唔好諗啦！」

(聽講佢女朋友對佢唔好，但結果你睇吓，咪仲好好地)

「夠唔夠膽同我賭？」

「賭咩？」

「五舊水？」

「黎咪黎！」

「就估十月前分到手既話，我贏！」輝爺拍左一下心口。

「好！」

「不過有一個前提！係我地兩個都唔準同徐亦言講一啲會影響到佢決定既說話！」洛妍突然提出一個請求。

「一言為定！」

「咁到底我係同你對賭定係同自己對賭緊？」洛妍係到自言自語。

「咩話？你講咩話？」

「冇野丫！」

(好彩輝爺你聽唔到)

(就算你分唔到手，我都有500蚊落袋，唔洗咁失落哈哈！)

(咁就交比個天決定啦！)

(如果你堅定咁行向我，咁我就擁抱呢個鼓起左咁大勇氣既你)

(可唔可以爭氣啲比我睇丫徐亦言？)

(續)

第二十一章、那個忍心把你推開的我

(已經隔左一日啦)

(佢都係冇搵過我)

(咁你仲睇以前對話紀錄做咩？)

(我好懷念以前同佢日傾夜傾既日子)

(而唔知幾時我開始會猜度下佢既心思，估佢點解會成日send啲心心既emoji比我，估佢點解會同我講晚安，點解成日對住我笑)

(因為我到依家都仲好記得某日我地係內閣玩個時我同佢貼得有幾近，當時我好似第一次知原來我個心臟可以跳得咁快)

(依家知左對方心意係鬆左口氣因為知自己唔係一廂情願，但同時意味住我唔可以再扮唔知自己其實係介入左人地段感情)

(我良心過意唔去)

叮——

「今日某位同事提起你，咁啱你今日放假佢話你好似女版既我」

(又會咁啱係我掛住你個陣你搵我既)

「係咩？咪繼續扮囉師兄」洛妍好努力擠出笑容咁覆message，逗下自己同對方笑。

(知唔知咩叫「冬天飲雪水」，就係咁既感覺)

「個日輝爺問我有冇男朋友，我答佢話我有，佢問我話咁你想等丫言等到幾時？我反應唔到，輝爺就係到笑我。」

「咁你想唔想有丫？」

(我點會唔)

「唔答你」

「點解？」

「我幫你揀左你返去佢身邊啦！」

(既然你一直都揀唔到咁今次我幫你做選擇啦)

(我唔願意要你背負住渣男呢個罪名，我都唔想你辜負你女朋友，佢跟左你5年啦，我既良心已經)

(趁我地未開始，趁我地未有咁深既感情基礎依家斬纜應該係最正確既決定)

(梁洛妍，正一矛盾究極體！)

(想人奔向你又推人走)

(人地話愛情係自私同時係偉大，今日我真係領悟到呢句說話既真諦)

(想你揀我係既私欲，但狠心推開你係真正既為你好)

(有時中意一個人，唔一定要擁有佢，可能睇住佢同另一半過得好好、過得幸福既話，對我黎講已經足夠)

洛妍望住左自己右手手腕，沉默片刻，諗起左唯楓隻手

(你唔可以選擇我，同樣我都唔可以選擇你。)

(我唔想再多一個女版唯楓)

(愛你，果然係孤單的心事)

「我想安安靜靜咁離場」

「點解？我都想回應你既心意」

「唔洗回應啦！我地已經令好多人都唔開心！我既出現已經令到太多人唔開心啦」

「咁我呢？」

「你信我，我知邊個選擇對你係最好，我做既野係為你好，你揀我既話你會後悔嫁！」

「點解會後悔？」

「我知你好缺安全感，我比唔到你嫁啦」

(你睇唯楓就知啦)

「但你女朋友可以！」

「加上我對你黎講只係一種新鮮感既存在」

「你真係咁覺得？」

「趁你未離開佢，你依家返去佢身邊仲黎得切！我貪心左兩個月，我要醒嫁啦，你都係，唔好咁任性啦」

「你覺得我同你一齊幸福啲定係同佢？」

「我唔知，我只係知咩係對你最好既選擇！」洛妍既電話屏幕上面多左幾滴水，每一滴都係帶有餘溫。直到洛妍雙眼同屏幕開始都模糊

(你唔係覺得自己好型好偉大㗎？)

()

(有冇咁中意佢㗎？)

(情與義，我揀左犧牲自己既快樂去換其他人既快樂)

(人地唔知你為左佢付出幾多，唔知你有幾傻)

(犧牲從來都唔係一個容易嘅課題)

(我知我開唔開心唔重要，佢同佢地開心就得)

(咁嘅犧牲先至有價值)

(連自己有冇幸福都可以唔理？)

(以前一直唔明白《比悲傷更悲傷的故事》有咩好喊，我今日明左)

(原來我曾經咁中意過一個人)

(你一心想為佢好而作出既決定未必結果係好，但你為左佢連自己開唔開心都可以拋卻不管，就呢份心意已經抵過一切唔好既結局。)

(咁樣你只係強行道德綁架佢要聽你枝笛嫁咋㗎？)

(係嫁，但我既解釋係——愛情從來都唔係用公平、道德呢啲準則去衡量、計算、量化得到既野)

(綁架係咪愛？)

(推開係咪愛？)

(對我嚟講，為對方無條件付出犧牲就係愛)

(不過依家)

(神，祢可唔可以賜我勇氣，一係跑向佢，一係離開佢)

(續)

第二十二章、第六天的那個晚上

自從個日起洛妍同亦言都有再講過一句說話，洛妍一直返工都心事重重，只係覺得返工見到亦言既身影都覺得刺痛緊自己個心同對眼，特別係當亦言唔再好似以前咁成日望洛妍，洛妍都知亦言好似有意避開自己，唔再成日出現係洛妍既座位附近，洛妍呢段時間返工都覺得好痛苦。

因為大家都知由陌生人變熟人再變陌生人既心痛係點

(捱埋佢，一個星期姐，好快好快，下星期就放假，唔洗見到對住)

「呼終於收工啦！捱埋聽日，第七日放假嫁啦！」洛妍搭緊巴士返屋企個時先可以鬆一口氣。

直到洛妍臨瞓前睇到IG一張帖文，係關於占卜下你中意既人依家係點諗、點諗你地段關係。

步驟一：靜下心

步驟二：默念題目

步驟三：選取/感應你最有感覺的一張牌

洛妍揀左第三張，張牌係紅色底，上面有兩隻獨角獸，獨角獸對角有兩朵玫瑰，一紅一藍。

洛妍好純熟咁翻睇結果，因為佢自從同亦言斷聯之後就日日睇、日日占下，結果有時準有時唔準

(其實呢啲野準同唔準都好我都會做既，因為本身占卜就係一種尋求自我安慰既方法，為既係想比個希望自己，等日子可以好過啲)

第三張牌解讀如下：

「TA想對你說：你總是讓我猜不透，我想走近你但一直找不到機會，你也在一樣在想我嗎？我們之間還未結束，就算我們暫時見不到彼此，但我可以感覺到你還未放棄，我們需要見面，只有當見面才會見到你真實的反應，我肯定你會有不同的感受。沒有把握那些可以和你自由自在交流的日子，是我問題；我沒有想到你對我的影響會那麼大，在你身上我到了很多東西，你讓我意識到我渴望精神上的交流，就像遇到那個擁有共同靈魂的人，有你的日子豐富多彩。

但你為什麼要推開我？到底你想要的是什麼？請你告訴我答案，我會盡力辦到；或者我不能引起你的興趣，也請你明示我。

我不想這樣耗盡熱情卻百思不得其解，讓我們有一次面對面的溝通吧！無論結果是如何我都會接受，我只是不希望這樣的僵局就成了我們之間的結局。我會來找你的，但請你不要對我視而不見。」

洛妍睇完解讀之後雖然有一絲安慰但仍然存半信半疑既心態但佢開始默念一句：「我只是不希望這樣的僵局就成了我們之間的結局。」

(唔知佢係咪真係咁諗呢)

(但我唔想做主動開口個個)

(點解你自尊要咁強？開口咁難咩)

(點解要我搞到好似我追佢咁姐？)

(我都會想做比人追個個嫁嘛，佢以前比女仔追開，咁我係想做最特別個個姐)

(但你唔開口先，佢成碌木咁，可能就咁就一世嫁啦)

洛妍默默咁打開左IG，建立左一個新既帳號，寫左張帖文

(嘩，真係幫到你盡嫁啦徐亦言)

(如果你咁都仲係咁唔識做就真係抵你一世錯過我)

(唔知佢睇唔睇到呢)

(如果佢睇唔到呢？)

(咁丫？我咪直接send比佢睇囉，唔知佢會唔會估到個作者係邊個呢？)

(又話唔做主動？)

(一次半次咪豪比佢囉！)

(咪咁雙標啦梁洛妍，話人敢怒不敢言，你自己夠係敢追夢唔敢追男仔)

(你錯左，你望一望依家我有勇氣唔理佢唔睬佢，但我冇勇氣離開佢！我到依家個人都仲係呢到，職都未辭你就知啦)

(就算幾心痛都係未走都係唔想走都係唔捨得走)

(原來我自己都已經做左選擇)

叮——

「你原來中文幾好。」

洛妍終於見到一個好熟悉既人名係通訊欄彈左出黎。

「你唔係唔想我見到我嫁咩」

(咪繼續口是心非囉！明明你不知覺得幾開心啦因為人地睇到)

「？」亦言黑人問號。

「你行開行埋都避我，眼尾都唔望下我咁，你以為我唔知咩」

「乜唔係你唔想見到我咩」

「？」輪到洛妍黑人問號。

「輝爺話你有中意既人然後唔想見到我嘛。」

「哦你想話主席？但等等先我有話過中意佢啫！我話主席幾好，做事有責任感咋冇話過唔想見到你。」

(至於我問輝爺點樣快速令人沉我原來輝爺唔明白我、唔明白女人心)

(係咪衰呢做左多搞到佢誤會左我咁多日)

(咁佢咪難過左六日囉)

(我靜係知佢既心痛應該不比我少)

(好啦好啦比多次機會你同我傾返計啦)

(一次咁多嫁咋)

「我以為你諗清楚，打算同佢雙宿雙棲添，所以避開我。」

「你低估左自己既重要性啦」

「我係咪逼左你二選一，我良心過意唔去，但我又真係過唔到自己個關。」

下一秒，亦言send左張圖比洛妍，係佢依家既即時通話，代表佢依家就打左個電話比佢女朋友同佢講分手。

「唔好啦，佢會唔會好難過」

(但係咪代表亦言揀我？)

「你會唔會唔要我？」

(欸你點解咁可愛，邊有男仔問呢句，多數都係女仔問！)

(唔知嫁，我咁多個追求者！)

「但我其實一早打算咗做犧牲個個」洛妍淡淡然咁講。

「比個藉口我去你身邊啦」

「你唔係一直都係我身邊咩？」

「我想你擁有我」

(我都係)

(不過我怕你女朋友同唯楓都會做傻事)

(究竟點先可以兩存其美？)

(雖然我係好心煩，但我已經拉唔返個嘴角返黎，因為呢個人真係為左我邁出左一步)

(我終於可以叫——光明正大同佢食飯、傾計)

(今晚發夢都笑醒)

(嗯，晚安亦言)

(續)

第二十三章、洛妍老師？

兩個人終於冰釋前嫌，以為終於可以迎來一段甜蜜嘅愛情之際，又不出意外地出現左意外。

叮——

亦言既訊息：「佢今朝醒左係我樓下等我，佢想見我。」

「」

「我覺得自己好衰」

「咁你會同佢講咩？」

(冇冇試過心情好似坐過山車咁，由最高點衝落返谷低咁)

(以你既性格，必然會心軟)

(如果我主動話放棄，亦言咪唔會為難囉)

(如果我主動話放棄先，咁就算亦言唔要我我都有咁大落差)

(如果我主動話放棄先，咁)

(咪皆大歡喜囉)

(又啱啱！)

(人地話遇上左中意既人第一時間係要放手先，如果佢係我既正緣的話佢會返黎)

(有道理！)

(咁佢唔返黎呢？)

(祝福佢囉！仲洗問)

「咁你返去啦」洛妍既心好似比一塊刀片鏢左落去咁。

然後，亦言一整日都有再覆過。

(好野，梁洛妍你係全宇宙最偉大個個！)

(送走左人啦，安樂啦？！)

(我重置下心情先)

就係咁洛妍訓左好幾個鐘，一醒咗就查閱message，結果都係令人失望

(其實佢有勇氣講分手，都足夠啦，仲想貪心幾耐？)

晚上十一點

鈴鈴鈴——

「訓左未？」亦言用半沙啞嘅聲線提問。

「你唔係？」

「我想同你講返我今日同佢傾左啲咩」

「嗯」

(我以為自己已經比你捨棄左)

「佢同你一樣，想將我互相推比對方」言詞間都可以聽得出亦言既難過。

(佢竟然)

「咁你」

(會點揀？)

「我想你可以好堅定咁同我講，徐亦言你跟我走啦！」

(我唔會咁講！)

(我都話我唔中意做主動！)

「但我要既係一個人好堅定咁揀我，可以奮不顧身咁揀我、可以無條件咁揀我、可以毫無顧忌咁揀我」洛妍一諗到呢點又有啲傷感，因為佢知做到呢一點既只有唯楓。

「」

兩人在此結束左對話，但照樣如常返工傾計，好似冇左件事咁。

(梁洛妍單方面冇左件事囉)

(我信佢會揀到做到一個喺既決定)

鈴鈴鈴——

「請問係咪梁洛妍小姐？」

「我係丫！」

「你好丫，上個月你申請左我地小學既教學助理，聽日有冇時間見工？」

「我我一陣覆你丫，多謝你比機會我」

「好丫，咁你5點前覆我」

收左線之後既洛妍心情重重，因為佢知如果佢走左，亦言會唔開心，自己都會唔開心，因為見唔到佢啦

洛妍一邊嘆氣一邊行去茶水間，迎面撞到徐亦言。

「做咩啦？你好心煩咁既樣既？」

「我有小學打黎叫我見工」

(第三份工啦已經，點拆？)

「去啦！唔好再為我留低！」

「但」

「我因為咁已經好內疚！」

「我做唔到嫁啦」

「相信自己！你咁叻女」

「」

(我而家先至確實咁明白你嘅感受，原來當自己做選擇既時候，你會想對方支持你，咁你先會更有底氣去作出呢個決定)

洛妍拎起左個電話，打返比個間小學既電話。

「喂？」

「我係梁洛妍，喺先貴校打黎叫我見工」

「哦，係呢你幾時得閒見工？」

「我返唔到丫，唔好意思！」

「咁好機會你唔考慮下？」

「唔我已經有更好既工作機會」洛妍望向一個方向。

(有緣再見啦 · 洛妍老師)

(續)

第二十四章、終於等到他約我去迪士尼

「洛妍，你最近有心事？」輝爺約洛妍單獨食lunch 個時間。

「嗯」

(佢到依家都係舉旗不定咁)

(想揀同我一齊但又怕佢女朋友做傻事)

「咁不如講出黎？」

「不如我約你出去同你去挽一日？」洛妍直接問輝爺。

「有靚女約一定會到！」

「認真我想透下氣！」

(我想透下氣！我好唔開心，想要人陪)

「得，我都好耐冇去透下氣！夠唔夠膽比個期我？」

「知激將法對我好有用！就星期六！」

「洗唔洗同丫言講聲？」

「唔洗！但點解我要同佢講聲？」

「佢一定會呷醋囉」

「」洛妍沉默左。

(喂我未係佢女朋友喎，到我係女朋友佢先管我啦！又想一拖二？)

(我愈黎愈覺得佢過分咁係咩意思先，自己唔約我都唔比人約我？)

亦言同洛妍識左差不多三個月，但佢地都冇單獨出過一次街。甚至洛妍有時都暗示下亦言，但亦言都係無動於衷。

(佢會唔會嬲？)

(關我咩事？)

(我中意同邊個出街都好，都唔關你事，做咩要諗你感受？)

(你唔係我男朋友！哼！)

「喂，洛妍，唔去啦唔去啦！」輝爺靜靜雞走過去洛妍個位。

「做咩事？」

「丫言黹豬丫」

「下？」

「走先走先。」輝爺行返返去自己個位。

洛妍一直抱住不解既態度直到放工，輝爺都有再同洛妍交流過，洛妍今日一整日都覺得輝爺有啲陰陽怪氣，平時好多野分享既佢今日靜左好多。

洛妍已經有一段時間冇收到某人既night call，但今晚突然收到

「訓左未？」

(又係呢把熟悉既聲音)

「未咩事？」

「一定要有事先可以搵你？」

「唔一定」

(你有冇事都搵我嫁啦 (?))

「但我又真係有事想講」

「？」

「我其實唔識講 (我感受) ，聽講你約左輝爺出去挽？」

「係丫，咁都『冇人』約我，我咪約人囉！乜你唔想咩？」

「我唔想」

「點解？」

(成日要人逼先開口)

「因為我都未同你出過街，點可以比輝爺早先過我約你！」

「你冇約我」

(咪繼續囉)

「我有苦衷嫁！」

「解釋ㄚ」

「我想處理好同女朋友單野先至約你」

「哦」

(呢個理由勉強說服到我啦，勉強囉！)

(咪口硬啦，梁洛妍又心軟左)

(咁徐亦言有咁既覺悟都算係咁啦！)

(算你啦徐亦言)

「之前問過你，問你睇唔睇鬼片既，其實我已經算係約緊你。」

「咁我真係唔睇嫁嘛！」

(我真係唔該你啫！)

「所以我咪笠水囉」

「咁你係咪唔想我同輝爺出去？」

「冇野ㄚ，我有嘢啫，去啦」

(口不對心你最勁)

「咁我去馬啦！」洛妍故意試探。

「誒！等等先」

洛妍真係好識扮野，特別係「扮走搏挽留」。

「嘻嘻！」

(奸計得逞！仲trap你唔到？)

「你真係幾佻皮嫁啫！」

「係嫁！咁你唔想我去你咪講囉！」

(你個金牛座，呷醋又要威又要帶頭盔)

亦言隔住個電話，低聲哼左一下。

「唔去啦唔去啦！」洛妍笑住講。

(知你呷、知你呷、知你呷醋啦！)

「咁你迪士尼張年卡幾時到期？」亦言深呼吸左一下。

「今個月4號。」
(你想點丫？睇死你得個問字)

「咁你星期二擺假？」

「我一早擺左假」
(我本身就打算自己入去挽)

「咁啱我都想入去睇下米奇老鼠」

呢句引到洛妍發笑。
(唉靚仔真係大晒)

「咁你開google search 相咪有囉！」洛妍忍笑。

「咁又唔好，有真人睇梗係睇真人嫁啦師兄丫」

一頓爆笑輸出中

(笑死，好中意聽你兜，次次都有新藉口笑下)

(終於捨得約我啦咩)

(益左你啦！)

(唔知一齊去會點呢？)

「嗯，咁你星期二都擺假啦！」

「好丫！」

(續)

第二十五章、預演夢之夜

洛妍今日放假，一訓醒就收到亦言既message：

「早晨丫，懶訓豬」

洛妍既嘴角上揚都係睇完亦言既message 必做既指定動作。

「早安，鏡鏡」

「今日忙唔忙？」

對方回覆：「忙丫，我仲整親手呢」

「下？」

三秒後亦言影左一張相比洛妍睇，手掌心被出一條鮮紅色嘅血痕。

「痛唔痛丫？」用咩語氣相信大家應該都好熟悉。

「痛丫」

「搞咩整親？」

(嗚嗚)

「比木板刮到」

「等等先」

「？」

「我依家比較想知既係另一樣你邊到得返黎嫁塊膠布！」

「哈哈！你真係得意死人！」

(哈哈你應該心諗你係咪錯重點，喂大佬我爆晒缸咁款，你靜係顧塊膠布！笑死)

自從亦言分左手之後，洛妍同亦言既關係好似開始明朗化，就算兩人冇確立身份但佢地兩個既說話同行為愈黎愈似一對情侶，例如朝早可以唔洗諗任何理由或者藉口去whatsapp對方，可以光明正大望對方傻笑，可以唔洗幾都知一定係同對方食lunch。

「有人呷醋嗆醋后！」亦言佢故意調侃洛妍。

「我邊有！哼！」

(邊會咁易認嗆，點知你會唔會得戚嫁？)

(依家好似可以光明正大咁呷醋，真係好)

(我真係好在乎「光明正大」)

(係因為我覺得單身你中意點挽都得，但有另一半我就唔接受任何理由去合理化呢個行為)

(依家既你係咪都已經向我邁向左一步？)

下晝五點

洛妍見亦言一整日都有再覆過自己，所以今次主動搵佢。

「今日好忙？」

(我放緊假，唔係你身邊但都想你至少應下我)

「唔係丫」

「咁你又失蹤左一日既」

「今日發生左一啲事」

「下？咁你點丫咩事丫」

(唔好嚇我！我好怕好怕係「生離死別」，我知你話過曾經你好難過，其實我都試過，我爺爺離開我既個日，我到依家都仲好記得，所以我好怕)

「晏啲同你講」

「好。」

(我今晚要黎睇下你先得無論發生咩事都好，我都會陪住你)

如是者，洛妍等亦言收左工、自己練完舞膽粗粗問亦言：

「有冇興趣開心事台，坐海旁？」

「？」

「洛妍姐姐出左門，係奧運附近」

(我想面對面同你傾，係你唔開心既時間比個擁抱你，好過隔住個電話我希望可以安慰到你)

「你講真嫁？」

「我呢到係唔比講笑嫁啫」

「好啦，你係下個站等我啦」

「OK」

洛妍見到亦言之後一齊行去海旁，但洛妍拉住亦言去左便利店。

「你想食咩雪糕？洛妍姐姐請你」

「我唔食丫」

「我唔開心既時候會食雪糕，因為『苦中一點甜』嘛」
(我唔知你發生左咩事，我只可以用自己既方法氹返你笑氹返你開心)

最終洛妍逼左唔想食雪糕既亦言食左一枝甜筒哈哈。

「呼終於行到海旁啦」

「嗯」

「可以講心事未丫？」
(我好擔心你丫徐亦言)

「嗯佢今日又搵我」

「你指曉瑩？」
(原來係咁都好既，始終唔係咩壞消息)

(梁洛妍你有少少唔開心？)

(有，但起碼佢地人有事先啦，如果唔係，徐亦言呢個人又會內疚一世)

(咁你呢？)

(我？我有事啦，對比起呢樣，我開唔開心都唔重要既)

(梁洛妍，感情上既偉大係冇獎擺嫁！)

(得啦！我有野嗰)

「佢今日去均港九新界買左我最中意食既野氹返我，想同我和好」

「你有冇心軟？」

「」

「姐係有啦！」

「話冇就假啦」

「我都估到你」
(以你咁善良既性格，一定心軟嫁啦，一定會想接受返佢)

(你想接受返佢既話我都會接受既，畢竟我我都知佢需要你)

(但我唔通就不值得被愛?)

(但你應該要心足囉，因為佢都已經為左你踏出過一步，咪咁自私啦梁洛妍)

「我唔想你覺得我對你唔認真」亦言隔左一陣開口。

「」
(我又可以點啲?)

「唉對唔住丫，我都唔知點算，我怕佢做傻事」

「我明你」洛妍忍住心痛，繼續扮冇野。

洛妍決定轉下話題，令氣氛唔好咁沉重。

「不如同你鬥跑！」

「？」

「我一定跑贏你」

「咪挽啦師兄，我以前跑開3000米唔通我又周圍同人講咩」

「大家咁話啦！喺，由燈柱開始跑到去垃圾桶」

「咪挽啦師兄，跑又出汗」亦言雖然係到唸唸碎，但對腳好誠實咁行左去燈柱旁邊。

(我都知你偏心我嫁啦)

「喺32」洛妍未數到1就偷步跑先。
(唔偷步贏你唔到丫，聽講你對腳長過我)

(比我賴貓一下)

洛妍係開跑既第五步已經比亦言追到，跑完全場只得喘氣聲。

「師兄你好奸茅」

「冇丫！」

「咪繼續唔認囉」亦言輕笑一下。

(你終於笑返啦！)

(唔開心既時間做下運動個人會放鬆啲)

(原來不知不覺，我已經教晒你我平時逃返自己開心返既方法，我估你都唔知我其實用呢啲方法令你笑返而唔係靜叫你唔好唔開心)

(我都唔知自己原來係咁溫柔)

「黎黎黎，坐返低透下先！」洛妍拍一拍亦言膊頭，拉佢坐返去長凳。

「你講野啦，繼續講野啦我想聽住你把聲訓」洛妍慢慢俟住長凳再慢慢合理對眼。

「」

空氣安靜左5秒，洛妍突然感覺到嘴唇一軟，洛妍即刻開眼抬頭。

(係咪你錫左我一下？)

(係咪你丫徐亦言？)

(一定係，因為我都希望個個係你)

亦言未等得切洛妍反應就伸手合理洛妍對眼：「我有免死金牌嫁，你繼續瞓啦」

(自己中意既人的確可以對自己做咩都得)

(好一塊免死金牌)

(唔好咁奸啦，徐亦言你自己生得靚仔都算啦，你仲贏晒全村人 (錫到我) 你仲想點？)

洛妍輕笑左一下，繼續閉目養神。

(等等，我有個諗法！)

洛妍突然望住眼前呢個男仔。

「喂徐亦言，你今晚開唔開心？」

「開心。」

「咁你想唔想再開心啲？」

「想丫！」

洛妍伸手捧住亦言塊面，印左自己既唇膏上佢既面頰。其後，亦言報以一笑。

(夠晒開心未？)

(早就已經想係個日錫你一下)

(邊日？)

(你成為我既END大人既個一日、個一刻)

(你既露西大人話好中意被你保護既感覺)

(你可唔可以以後都就咁樣保護佢？)

「喂！師兄你識唔識瞄準嫁？」亦言投訴洛妍錫左落佢塊面。

洛妍又笑到見牙唔見眼：「我識嫁，我係錫面丫嘛。」

洛妍講完再錫多次亦言塊面，但亦言突然間擰轉左個頭，今次洛妍就錫左落亦言個嘴到。

(怕羞都黎唔切丫大佬)

「你真係丫」洛妍苦笑左一下，亦言就係到偷笑。

「徐亦言？」洛妍開口叫。

「係？」

「徐亦言？」

「咩事？」

「徐亦言？」

「嗯？」

「徐亦言？」

「做咩啦？」

「徐亦言！」

「係！」

洛妍突然叫左呢個名好多聲，但對方唔知佢係咩用意。

(你知唔知世上最短既咒語係咩？)

(係人既名字)

所以洛妍叫完亦言個名之後都有一句許願：

第一次：徐亦言

(你中意我多啲啦好唔好？)

第二次：徐亦言

(你快啲快啲跑向我啦好唔好？)

第三次：徐亦言

(你對我好啲得唔得？)

第四次：徐亦言

(你可唔可以唔好再令我失望？)

第五次：徐亦言

(你可唔可以同我講個句我一直好想聽既個句？)

「係喎，你今日返左成日工，一定好叻嫁啦。黎啦，洛妍姐姐比你俟膊頭馴覺。」

亦言好乖咁俟去洛妍既膊頭，洛妍係呢個時候輕輕摸下亦言既頭。

(有洛妍安慰你，唔知你既憂愁會唔會因為我而少左啲啲？)

(我地依家咁好似真係一對情侶)

(我等緊你等緊你一個正式既表白)

(等緊你show你既誠意)

(但曉瑩搵返你我知你又會心軟啦)

(到底我要幾時先可以唔洗再淪為被選擇既選擇)

(真係好討厭呢種等你揀既感覺)

(講係咁講，但我到依家都仲係耐心咁等你)

(梁洛妍到底係傻定蠢？)

呢個時候亦言捉住左洛妍隻手，想拖住佢馴咁，洛妍心領神會，乖乖地比佢拖住。而洛妍既視線就落左係亦言手腕上既黑水晶鏈。

(其實我好早發現你有帶)

(我當時心諗邊有男仔咁迷信)

(我想有一日可以幫你除左條鏈然後同你講：你唔洗信呢啲，信我就夠)

就係咁佢地係海旁坐左一晚，等到日出。

「起身啦，返去啦」洛妍用最溫柔既聲線叫亦言起身。

「嗯」

(唉依家你好拖住我行啦真係蠢蠢丫徐亦言)

(以後係咪都要我逐樣教？)

(知你會應咩嫁啦)

(你實會話：我好想嫁，但我驚你覺得我有咩非份之想點點點，我冇膽)

(咁你又夠膽中意我？)

「一陣去迪迪尼」洛妍欲言又止，因為見亦言好叻好眼瞓咁既樣：「算啦，你返去瞓啦，我自己去都得」

「你仲諗住去嫁？」

「嗯，我返去訓一陣就出門。」

(因為我唔去唔得)

「咁我送你到火車站啦。」

「好。」

「拜拜啦。」

「嗯，快啲返去啦！」

(續)

第二十六章、一些該想通但未想通的小事

洛妍如是者訓醒就單拖去迪迪尼。

(今日好重要好重要，就算得自己一個人去都要打扮得好好睇睇，畫一個完美既句號)

洛妍揀左一條黑色既連身短裙，束起左波波髮型，洛妍噴一噴香水係手腕上，隨即一手拎住粉紅色既迪士尼頭箍出門。

洛妍一到迪迪尼門口，成個腦都浮起左好多畫面。

(呢啲係咪叫回憶？)

(係咪當得我自己一個既時候，先會知咩叫寂寞，先會特別想有一個人陪)

(但明明我已經好努力努力學識自己一個人面對寂寞)

(咁點解今日又會諗起你？)

(我記得你當日同我一齊整呢張年卡，記得就係係呢到你唔見左張學生證，記得我點樣幫你搵返，記得你見我拎起左粉紅色頭箍睇左3次都係唔捨得買，然後你二話不說拎左去比錢，記得你係點樣扭計要我買爆谷比你食，記得每一次都係點樣扶我上落機動遊戲，記得你點樣笑我睇米奇戲院次次都比人嚇到，記得我話送公仔比你你有幾開心，記得你點樣係迪迪尼入面發我脾氣但最後都會死死地氣搵返我)

(我記得既野原來太多)

洛妍早係琴日已經知唯楓都趁住年卡到期前黎左迪迪尼，不過佢唔係同洛妍黎，都唔係自己黎，而係同另一個黎

(我冇難過，只係)

(我到底係掛住你定係我係懷念緊我地一齊黎呢到玩既感覺？)

洛妍每行過一個景點或者設施都覺得隱隱約約見到唯楓既身影咁，唔係真係肉眼見到個種見到，而係心眼見到、回憶見到。

直至洛妍漫不經心咁行到space mountain 既入口，排完隊坐上左車卡後

(我個心真係幾亂下)

(因為我依家望住隔離懸空既座位係到諗如果亦言係到就好啦)

(喂你唔係黎哀悼你同唯楓單野嫁咩？)

(係嫁，但我知呢啲回憶會隨住時間慢慢沖淡，畢竟唯楓知我係因為內疚而留底)

(佢話佢知我對佢一早冇左感情，咁唔叫愛情)

(佢有新開始啦，我唔怪佢，我反而好想佢開心幸福，因為我知佢同我一齊，大家都好痛苦，以前我話我如果分開左我絕對唔會祝福佢，天蠍座丫嘛，點會想佢開心既原因因為唔係我嗰)

(佢話佢會祝福我，當時我唔明，但我依家明，因為你曾經對呢個人付出過真心，你只會想佢好，就算當中有恨，但當你對佢既愛大過恨，你會有一日都可以偉大到係到諗如果有另一個人比你更愛佢，你會捨得接受同放手，只要對方過得好、過得幸福就得)

(我梁洛妍好有福份領教唯楓既身教，因為佢我先知原來愛一個人係可以咁卑微、咁偉大、咁刻骨銘心)

(咁我係咪應該成全佢對我既祝福？)

(佢話佢唔想我同另一個一齊，但佢同樣偉大到話佢唔可以阻止我奔向另一個比佢更好既人，因為佢都想我幸福)

(愛一個人，係咁矛盾、係咁固執、係咁痛苦嫁啦)

(咁點樣愛一個人先算啱？)

(咁點樣愛一個人先會令自己唔後悔？)

「啊—————」車卡上既遊客一陣尖叫叫醒左洛妍

(我突然醒起唯楓話過佢覺得從來冇擁有過痛過擁有過之後失去)

(我唔同意佢既講法係因為我覺得如果從來冇擁有過既話，投放既感情都唔多，咁傷心既程度都比較少，抽身都比較快)

(佢話感情唔係有數得計，佢話：就算分開左有幾痛苦都好，但總叫曾經有一齊過既甜中和返呢種苦)

(或者都啱既)

(咁點先可以唔後悔？)

(唯楓答過我：由我第一眼見到你開始，我就中意左你，中意係冇得後悔，邊個都可以阻止愛情既來臨，中意左就係中意左)

(唯楓你講得啱，依家既我對你呢番說話既理解係：你十年後或者會後悔係愛情作出既任何決定，係因為你有比依家更多既經驗同閱歷，但依家既你只要遵從自己既內心作出決定，你先會無悔、你先會甘心去接受呢個決定帶來既結果。你冇得後悔係因為當時既你中意左就係中意左，為左一個人付出左就係付出左，我地冇得否認呢個事實，只要你當時係真心既話，日後點睇返自己都唔應該用後悔呢兩個字去形容，因為當時既你根本唔知未來係點，咁又點樣去比較同衡量呢)

(喂我發現自己都少癲嫁嗰，竟然坐緊過山車嘅時候諗通咗)

(笑死)

(咁要唔要珍惜下眼前人)

(講到咁，唔要唔得啦？)

(如果你今日、依家肯黎，我就送你一個女朋友啦)

洛妍舉起左手機，打開左通訊錄內既常用聯絡人

「嘟嘟——嘟！」

(？)

(咩事？)

「對方拒絕來電」

(下？)

(徐亦言你好野，cut我？)

(我唔會再打第二次！)

如是者洛妍黐爆爆咁去玩其他機動遊戲。

(唔係嗰，唔對路！佢未試過唔聽我電話，就算冇聽都會打返比我)

(唔通係？)

(佢同曉瑩一齊緊？)

(試下唔好亂諗嘢先？)

(有啲難，因為我已經成個腦諗住佢)

(哼！佢損失慘重啦今鋪！)

夜晚7點左右

徐亦言打返電話比洛妍。

洛妍既第一句有啲唔客氣：「唔係cut我嫁咩？」

「嘩冤枉丫包大人！我屋企人幫我cut嫁，我入左房訓」

「哦」

(算啦，我信你啦)

「你訓到依家？」

「係丫！你真係入左園？」

「係丫，哈哈我玩晒所有野嫁啦單拖」

「你好癲丫師兄」

「咁你依家仲黎唔黎」

「唔啦，咁夜」

「咁好啦。」

(仲想話如果你黎，我會做你)

(但你唔黎都好既，起碼，我今日叫幫自己同唯楓既感情係年卡完結既呢一日畫上左一個完美句號)

(就好似你話你想處理左你同曉瑩既關係先約我咁)

(咁當我再黎整一張新既年卡就應該代表一段新感情既開始)

洛妍同亦言隔住個電話傾計，傾到煙花完結

(咁算唔算都叫一齊欣賞左煙花？)

(唔知幾時真係可以「一齊睇」？)

(唔知幾時先係right timing？)

(續)

第二十七章、心淡記

今晚係老闆請員工食飯既日子，公司大部分既員工都有出席，當然包括亦言同洛妍。因為洛妍補完習先趕過去，加上蕩失路所以遲到。而亦言都一早留左身旁既座位比洛妍。

洛妍幾經辛苦終於都到左餐廳，坐低冇幾耐大家都係到傾計，但唯獨亦言同洛妍冇咩點交流。

(喂你不如都同我講下野？)

(比我坐你隔離但你又唔出聲咁，咁不如我坐老細隔離，又不如我坐隔離枱啦)

(算啦。梁洛妍你又唔係唔知徐亦言係人前唔會同你講野，係人後又對你好熱情好多野講)

(佢要面子掛？)

(做比你囉)

(我咪同丫kai輝爺佢地傾計囉)

「喂！丫kai你係到做咩？」老細突然係對面指住丫kai。

「咩事咩事？」kai同洛妍異口同聲咁問。

「kai你隻左手同洛妍隻右手係檯底做咩？」

(原來老細誤會左以為kai係檯底拖住我)

「冇丫冇丫！」洛妍即刻舉起雙手揮動，下意識用餘光望下亦言

(仆街啦！徐亦言又會呷醋啦)

(個傻佬一定會唔開心啦)

於是洛妍澄清左之後望住亦言，用口型問：呷醋丫？

「冇丫冇丫！」亦言搖頭。

(好啦真係唔呷？)

(失落你個頭啦梁洛妍)

(好事黎，唔洗氹)

(但係咪都代表佢唔在乎我？)

「喂！丫言，唔係唔飲丫嘛？」老細舉起左個杯酒。

洛妍都未等亦言回應就舉起左自己個杯：「我幫佢頂！」

(仆街，我想醉丫！)

頓時，成檯人都望住左洛妍。

「唔係丫嘛，丫言要個女人幫你頂？你係咪男人黎嫁？」老細一定係mean—mean我地先嫁啦。

(笑死)

(我幫佢頂都係想睇下徐亦言有咩反應)

結果徐亦言係冇反應既！

(都唔係既)

徐亦言係洛妍耳邊講左句：「唔好飲咁多啦師兄！」

(你野又唔多同我講句)

(照顧下我，夾下菜比我咁你又都有乜點做)

(成晚老細佢地叫我飲，你一杯都有幫我頂過)

(你靜係識睇住我飲，同埋係咁意叫我唔好飲之外你仲做左啲咩？)

(連老細誤會我同kai拖手你一句聲都唔敢出，由我繼續比人誤會)

(最慘係你唔同我講野我咪同kai傾計，到人地誤會某程度係你造成既，但你唔想人地誤會既話又唔開口，睇住我出醜咁都唔會為我出一句聲)

(唉咁叫中意我？)

(係咪我對你期望太高，所以我先咁失望)

(你到底有幾怕啲同事知我地中意對方？)

「喂，一陣直落唱k點睇？」老細主動提起。

「一定要到啦！」東尼代答。

「係咪你比先老細？」

「冇所謂！最緊要大家玩得開心！」

如是者，成班人一齊直落唱k，洛妍唱到劫就坐低左同大家一齊玩骰。

「五個六。」

「加一！」

「開！」

洛妍毫無懸念輸左幾鋪，咁咪罰飲左幾杯囉。

(唉又輸又輸)

呢個時候，亦言係洛妍耳邊講左句：「好飲得啲言嫂？」

洛妍苦笑左一下。

(真係好諷刺！)

(呢頭又話冇呷，個頭叫我言嫂)

(姐係呢頭唔在乎我，個頭又比啲咁既稱呼我想比個假希望我，比我以為你會揀同我一齊咁)

(呢頭叫我唔好飲，個頭話我好飲得)

(你咪繼續睇住我醉落去囉，我其實都唔想再醒，因為我討厭自己咁清醒咁面對住玩緊我既你)

老細都唱到劫就坐低左係洛妍隔離傾計，但洛妍有啲劫就俟後想休息片刻，終於老細就隔係洛妍係中間，而撩亦言傾計。

「丫言你今日心事重重咁既？發生咩事？」

「我唔知點揀」

「咁你出一出黎，我同你傾傾」

亦言同老細隨即行左出房外。呢個時候，洛妍開左眼，忍住左想流出黎既眼淚，因為佢知如果合理眼，眼淚會跌出黎。其實洛妍未瞓，佢聽到晒兩人既對話。

(你到底仲要想點樣？)

(你係咪嫌未傷夠我？)

(你知唔知你每一次去問人應該揀我定係曉瑩，對我黎講都係一種傷害)

(因為你咁樣做，只會一次又一次咁提住我，我係等緊比人揀)

(我真係好討厭自己淪為比人揀既選擇，我討厭呢種感覺)

(我討厭你唔係堅定咁選擇我)

(我只係想有個人可以為左我衝破一切既原則，好勇敢咁同我講想同我一齊、想保護我、想對我好)

(而唔係睇住我點幫佢頂酒、睇住我有幾辛苦身水身汗搵佢陪佢行海旁、睇住我有幾心痛咁睇住佢同前女友糾纏、睇住我一次又一次咁對佢失望同心淡)

(而唔係好似係鋪頭到揀貨咁，呢個好啲定係個個好啲？要個sales比意見)

(我到底係你眼中算係咩？)

(我到底仲要受幾多委屈？)

(你到底幾時先會真心對我好？)

凌晨兩點

大家都散band，亦言都拎起左個袋望住洛妍，示意一齊返去。

出到房門外，亦言好順手咁拖住洛妍打算行樓梯走。點知洛妍望到遠處丫迪同kai原來仲係門外等lift。

「啊佢地未走既」洛妍想指比亦言睇。

但就係呢一刻拖住洛妍既手就鬆開左，而洛妍個心都係呢一刻碎左，碎到一個點，今次真係拼都拼唔返。

(你真係有咁怕佢地知我地兩個既事)

(明明你都分左手)

(我好唔容易先等到你主動拖我)

(我真係唔知自己仲要受幾多委屈？)

如是者，大家一齊行去截的士

「喂，丫言你唔係唔送洛妍返屋企丫嘛？人地話晒飲左酒！」丫迪佢地質問。

「」

「唔洗啦！」洛妍見亦言冇回應，主動答話唔洗以免尷尬。

(你個樣面有難色咁，係人都知你唔想送啦)

(我咪話唔洗囉，我怕你直接答唔想，咁我咪癩皮？)

最後亦言都係跟左洛妍上車。

(你唔想真係唔洗勉強)

(唔係真心可以唔洗做)

(佢地係到用激將法你先跟我上車姐)

(如果你真心想送，洗咩等人走左先送)

(點解一定要冇人你先可以做返自己？先可以對我好？先可以對我表露少少既中意？)

(咁你怕呢樣怕個樣，怕比人知你中意我，咁你一開始就唔好中意我、一開始就唔好拖我)

(因為老娘真係受夠委屈)

係車上，洛妍都係比亦言俟膊頭訓教，今次唔同既係洛妍趁亦言訓緊個時，輕輕錫左亦言個嘴一下。

「你終於肯主動錫我啦」亦言慢慢睜眼。

「嗯」洛妍苦笑。

(第一次，亦都係最後一次)

(goodbye kiss原來一啲都唔甜，苦到我個心都住痛先真)

(比我摸多一次你塊面，之後我就會放底你)

(我已經夠晒心淡)

洛妍落車比埋亦言既錢，就係轉身門埋左車門個一刻，洛妍個心已經死左，中意徐亦言既心已經死左。

(徐亦言，你知唔知失望既盡頭係咩？)

(係絕望)

(續)

第二十八章、斷聯週記

洛妍同亦言冇要交集一段長時間，但就算洛妍同亦言斷聯都好，佢都係會時不時睇下亦言既whatsapp icon，睇下亦言有冇上線，仲會返工既時候偷望下亦言，而每一次洛妍都偷望失敗。知唔知點解？因為亦言有心避開洛妍

洛妍每一日返工都覺得好痛苦，只要諗到以前係點傾計依家係點斷聯，個種落差感係令到洛妍每日每夜都崩潰。

(點解我地最後會搞成咁？)

(點解你要避開我？)

(你仲想點折磨我？係咪嫌我唔夠痛苦？)

(但無論係點都阻止唔到我個心、我個腦諗住佢)

(知唔知係一種點掛住既程度？)

(就係我每聽到手機有一下鈴聲，我都希望sd message
比我個個係你，每聽到一下電話響，我都希望打比我個個係你)

直到有一日洛妍終於鬆左一口氣，因為亦言請左假

(呼我終於唔洗再對住佢！)

(梁洛妍，你好唔想見到佢咩？)

(痴線啦！我嗰！點會想見到佢？依家見唔到仲好，心唔洗煩！)

(係咩？咁你每日心痛到咁仲返到工？仲唔辭既？咁支撐住你返工既又係咩？)

(我)

(其實你口硬有咩用？認啦就算心痛都想見多佢最後一面姐)

(認囉咁，可以點啎)

就係洛妍失神之際，洋洋打斷左佢既發呆時間：「唉，個個都唔返工，輝爺又病左，咁言又去左迪迪尼做吸血鬼」

(？)

(你話咩話？)

(佢去左迪迪尼？)

(佢自己去咩？)

(點會丫)

(佢同朋友去姐！)

(你覺得呢？)

(你問我，我直覺係同佢女朋友)

有時女人既第六感好準，準到你唔信，而天蠍座既直覺準繩度更加係加乘再二次。

就係咁，洛妍個心又崩左一個大角，返工返到冇晒靈魂咁，全日等放工咁款。

(好彩今日早放工返學校開會，唔洗困係呢個地方諗住某人)

如是者，洛妍集中精神咁去開會、集中精神咁同學仔傾計講笑，盡量唔比自己諗起某啲人。

「不如我地開完會去打牌、去party room玩啦？」

「好喔」

(反正我冇野做)

(算啦你，你想有人陪你姐)

(係丫，咁我就唔會諗起佢)

好快洛妍同啲同學仔去左旺角既party room玩，佢地打牌、唱k、飲酒，洛妍成個流程跟足晒嫁，直到

「洛妍，你幫我點一點歌啦！」

「好丫，你想唱咩？」

「小幸運」

「」

「禁啦！係咪唔識打字？」

「唔係可唔可以唔好唱呢隻？」

「點解？」

(係囉，做咩要咁霸道嗰梁洛妍)

「冇野冇野，我聽到好厭姐！」洛妍強顏歡笑左唔知幾多秒。

「但我真係想唱嗰」

「唔緊要啦，你唱啦」

洛妍一聽到個前奏，眼眶就自動自覺發紅，因為佢醒起曾經某人唱過呢首歌比自己聽，仲要係改詞版，知唔知有幾難忘？

「你洗唔洗去個廁所洗下面？」其中一個男同學謝卓庭察覺到洛妍既異樣，輕輕拍一拍洛妍既膊頭。

洛妍心領神會，強忍眼淚，企左起身：「係囉係囉，劫到呢。」

就係洛妍行出房門埋房門既一刻，洛妍既眼淚奪眶而出，開始嚎啕大哭起黎，但佢怕房入面既同學聽到所以故意走遠，瑟縮左係一角，抱住膝頭喊，因為佢聽到佢個心入面好多謎之聲打擊緊佢：

(人地今日去玩丫！當你冇到！)

(佢去迪迪尼嗰，但唔係帶你去嗰！)

(你等左咁耐，人地最後都唔係揀你嗰！)

(醒下啦，人地唔中意你，咪咁cheap啦)

(但佢話佢中意我嫁嗰)

(咪就係呃你囉，鬼叫你咁蠢咁易呃？係我都呃你啦)

(我唔信，佢話唔會呃我)

(你傻啦，中意你就唔會咁啦)

就係呢個時候洛妍既電話響起左，洛妍都未黎等接聽就見到一個男仔舉住個電話行左出房門，左望右望，直至佢同洛妍對上眼。

「你你追出黎係？」

「算啦洛妍，一生人總係會遇到幾個fxxkboy嫁啦」

(你點知我？)

「佢唔係fxxkboy黎」洛妍好細聲咁講 (唔知有冇人聽到)

「咩話？」

「唔係丫，我係覺得自己同呢到好格格不入你地好開心咁，但我呢，我好沉重，我好似透唔到氣咁！」

佢輕輕拍一拍洛妍個頭，好溫柔咁話：「冇事既，放鬆啲！」然後洛妍一抬頭就見到佢拎住自己中學張八達通舉比自己睇

「比你睇下謝卓庭幾年前既seven樣」

洛妍輕笑左一下。

「笑返咪好囉！喲，張卡比你，你想落街行個圈透下氣又好，或者拎我張卡買酒又好，透順氣先返黎啦好冇？」

「我冇事」

「真係？」

「嗯！」

(原來呢個世界仲有人關心我，只可惜關心我既每一個、關心我既個個都唔係你)

(咪繼續入房賣醉囉)

(就比自己飲多一杯啦)

(一杯咁多啦)

(好唔好？)

(我唔想清醒)

第二日第三日洛妍都係一放左工就約人去飲酒，今日都唔例外：

洛妍好唔容易捱到5點，佢就舉起左電話，約左兩個女同事——尼尼同埋sharan姐姐：

「今晚得唔得閒？」

「可以丫」

「我想飲酒」

「你係咪唔開心？」

「今晚講」

「不如食飯先」

「好丫」

如是者三人食完飯就去左酒吧飲酒，尼尼趁sharan姐姐去左廁所既時候偷偷地問洛妍：

「洛妍做咩唔開心？」

「」洛妍又忍唔住爆喊。

「sorry丫，我唔問啦我唔問啦！」

呢個時候sharan姐姐返埋位既時候見到洛妍喊都嚇呆左，準備教訓整喊洛妍既尼尼，洛妍頓時開口解畫

「唔關唔關尼尼事係我唔開心到佢一開口問我就就忍唔住」

佢地兩個好留心咁聽。

「我忍左好耐，忍左好多日返工都冇喊嫁啦」

「咩事丫？」

「我中意左個人，但佢有女朋友我等左佢好耐啦但佢都係咁依家仲唔理我啦我點算好？」

「你中意左佢幾耐？」

「我估計計埋埋都你當半年咁啦」

「哦冇事啦女，幾個月貨仔好快抽離到」

「真係咩？但我已經好痛啦」

「忘記佢啦女，你話幾年就話姐」

「咁你試過中意一個人堅持中意左幾耐？」

「七年。」

「下！冇一齊？」

「冇丫！」

「咁你到依家都仲中意？」

「係！」

「我心服口服」

「所以你未夠一年既你，冇野需要傷心」

「」

「覺得痛就放手啦」

「但我好唔甘心，我放棄左好多野但最後都唔揀我。」

「付出左就冇得計較嫁啦女！」

「」

「放棄啦乖啦」

「你地知我硬頸」

結果佢哋由勸我變成說服自己縱容我既任性。

「痛到一個點，洛妍你就會捨得放手嫁啦」

「嗯，我遲早有一日都諗通」

(遲早囉)

第二十九章、：小鏡，生日快樂？

話咁快斷聯既日子眨吓眼就過，話咁快就到洛妍既生日

(今年既生日真係唔想過)

(又唔係同我想過既人過，有意思咩？)

(唔過都得既)

洛妍電話一響：

「喂，你生日有冇人約？」

原來係學校學會主席高諾問洛妍，兩個算係學會入面比較熟，平時都會出去玩或者練下舞。

「冇丫」

「我約你囉」

「又好姐」

(有人約咪去囉)

(佢唔約你姐我仲有其他人約，哼！)

(咪痴啦！佢點會約你，估計連小鏡生日都唔記得)

「一陣返學校開完會傾！」

「好」

「點解等左咁耐都未見諾個人影既？」

「不如打比佢啦？」其他同學表示。

洛妍舉起電話：

「喂，全村人等緊你嗰」

「我知！我幫緊個垃圾買緊野！好快到！」

「好啦好啦！」

洛妍收左線之後繼續主持會議，主持左半分鐘，洛妍身後傳黎歌聲

「Happy birthday to you....」

洛妍一拎轉頭就見到高諾捧住左個蛋糕入黎，洛妍瞬間感動到不行

「許個願先啦」

「嗯」洛妍雙手合十再扣指，慢慢合理雙眼。

「你個願望咁長嫁，好貪心！」卓庭係到笑洛妍。

「我唔記得點許願㗎嘛！」

(自从我離開左唯楓之後，我好耐冇再許願，因為冇人再同我過生日，冇人主動問我想要咩禮物，冇人會主動想幫我實現願望)

(所以我頭先短短半分鐘既許願時間入面，有16秒係唔知自己要許咩願望)

(最後我係危急關頭成功諗到3個願望湊數，笑死)

(一個完美既願望入面應該有啲咩？一係有身體健康同埋)

(講左好似會唔靈啲)

(重要野唔講咪得囉)

(咁又係)

「我好感動，多謝你㗎諾但原來你話個條垃圾係我哈哈！」

「係㗎，仲打黎催我」

「我都唔知哈哈！」

(如果唔係你地既話，我應該會忙到唔記得左自己生日)

「壽星女，切蛋糕！」安妮 (其中一個成員) 遞左把膠刀比洛妍。

洛妍小心翼翼咁切蛋糕，堅持切到一半就停手。

「你做咩？」㗎諾問。

「切到底，會嫁唔出」

「有咩好怕，你本身都」

洛妍苦笑左一下，但佢唔會計較，因為佢知㗎諾係講笑。

順利食完蛋糕、開完會之後，有幾個話唔想咁早返屋企（包括洛妍）

「我地去網吧打機，你去唔去？」

「我未去過嗰，唔識打機」

（但我唔想自己返去唔知做咩好）

「我地想湊齊人嘛」

「好啦，咁你地教下我」

如是者，洛妍跟住佢地去網吧打機。

「安妮，你幫洛妍開個帳號先啦，再幫佢揀一隻英」丫諾指揮安妮。

「收到你」

（英？係咪英雄？）

（應該係，除非唔係，我真係一頭霧水）

「洛妍，諗個ac名黎先啦」

「哦哦」

（噢，聽講有人用中意既女仔名做自己game角色個名）

（唔知真定假？）

（不如試探下？）

（你點肯定人地玩既同你依家開既係同一隻game）

（試下唔好再質疑天蠍既直覺？）

（收到你）

洛妍直接係keyboard打左自己個英文名。

「此名稱已被使用」

（佢冇呢我）

（呢啲係咪叫低成本浪漫哈哈？）

(結果係另一個陌生人用呢個名就好笑啦！)

(唯有改一改個名啦，咁改咩好，我都只係想用呢個名)

(點解？)

(因為我個腦得呢個名，得佢提過既呢個名，其他名我都唔想用)

(情侶款係咪？哈哈)

由於唔可以同其他玩家撞名，洛妍唯有重複自己個名多次，然後懵下懵下咁跟佢地學禁下4個基本鍵。

安妮一野搶左洛妍個滑鼠：「洛妍你睇住我示範一次先！」

「哦哦」

(專心學習中)

「嘩你咁快手既邊學得切喎」洛妍對眼開始跟唔上。

「洛妍你試下自己黎一次」安妮放左手。

「唉死就死啦！」

「哈哈！唔係亂禁丫洛妍！」

說時遲那時快，5秒後，屏幕變左黑白色，屏幕既上中位置大大隻字寫住「你已被擊殺」

「對唔住丫，我又死左啦」洛妍同隊友道歉。

「唔緊要啦，你盡左力，你又係新手，正常既」安妮安慰洛妍。

「完場take個break先啦」丫諾同大家講完轉身行去洗手間。

安妮一轉個頭就見到洛妍竟然開youtube
不斷睇教學：「大家知唔知洛妍做緊咩？佢係到睇教學！」

「哈哈！唔係掛？」卓庭大笑左。

「你洗唔洗咁努力丫洛妍？打機姐」

「你知梁洛妍做咩都係咁努力嫁啦！我唔想拖累你地」

「完全見到一個努力型既選手坐左係到」卓庭以講笑既tone咁讚洛妍。

「洛妍好努力嫁啦」洛妍回應。

「見到丫你好努力咁送頭囉！」卓庭補刀中。

咁啱丫諾返埋位聽到一齊大笑埋一份。

(我要再努力啲先得！)

(點解呢？你唔係黎玩下嫁咋咩)

(我想)

(想同人玩呢？)

(唔知你講咩啲)

(咁你又post IG話自己玩緊？)

(繼續試探囉)

(建議講返中文)

搭正12點，洛妍電話傳來左一條訊息

「祝小鏡生日快樂」

(下刪一千字)

(叫得呢個名大家都知邊個sd黎嫁啦)

(但唔比你地睇洛妍收到啲咩，哼)

洛妍想扮睇唔到，但佢對手又開始唔聽話啦。

(佢仲記得我生日)

(車，好叻咩，夠膽出黎見我)

(你又開始發癲啦，人地都揀左)

(但我蹦蹦地啲)

(蹦蹦？)

(搞到我咁唔開心，仲好意思叫我快樂)

(繼續口不對心啦)

(明明想人地搵你)

(要keep住呢種嘔既情緒我先有理由主動打去「鬧爆佢」)

洛妍直接禁左個通話鍵：

「你咁係咩意思？」

「？」

「你搞到我咁唔開心，好意思叫我快樂？」

「咁我係咪唔應該同你講？」

(過左火添)

(你咪試下唔好講囉，我會再嘔啲)

洛妍採取直接無視，再繼續鬧：「你唔係好開心嫁咩？你都揀左啦」

「對唔住但你唔係唔係對我有感覺啦咩？」

「下？邊個話？我幾時咁講過？」

「個日公司食飯，你親口同其他同事講」

「下下下，我邊有？」

「下，佢地咁同我講既，係親口啲所以我先揀返同女友復合」

「但我冇印象啲」

(世紀大誤會)

(依家知又點？)

「我可能嘔你係到揀左揀右之下隨口講掛，但我真係冇印象」

「」

「你開心啦」

「我冇如果計開心既話，呢幾個星期得呢個電話令我真正開心返」

(我都係)

(因為終於聽到你把聲)

(梁洛妍口是心非程度如果一百分比係滿分既話，我會比A+)

「哼」

(有咩用，就算我地互相中意都好，結局都係咁，你永遠會心軟佢，唔會心軟我)

(但佢點解會話呢個電話令佢真正開心返？)

「啊，我要上返去啦晏啲再講。」

(我消失左咁耐實比人問)

(唔咁講點延續話題)

「咁又係，你今日係主角丫壽星女」

洛妍輕笑一下，點頭收線。

(收返個嘴角啦梁洛妍)

(笑返咪幾好)

(個電話係咪安慰到你？)

(係)

「喂你消失左既？」佢地問起。

「哦係丫，我屋企人打電話搵我」洛妍面不改容咁老作。

(學下某啲人成日借丫媽過橋)

然後又笑住咁打機

(快啲學好學叻！)

(咁先可以「家暴」某人)

第三十章、敢不敢，以後都這般甜蜜？

自從呢通電話之後，兩個人又重新有交集，雖然冇一開始咁日傾夜傾，但係公司都仲會有講有笑。

直至公司黎左一個新既女同事，衣着打扮比較成熟性感，我地一開始連佢個名都唔知，只係知佢份人都幾冇禮貌，周圍叫人喂，連上司都係

後來其他同事八到佢叫咁，丫迪佢地幾個就開始撩佢傾計。

(知你地咩料啦我)

(見人着得少布少少就暈晒大浪)

(丫姐我未戰鬥格咋！)

(等等先，我係到比較啲咩？)

(人地着咩關我咩事？)

(唔關啲又真係)

(你擔心？)

(邊到有？擔咩心？)

(口是心非達人——梁洛妍)

(佢唔會係啲咁既人！)

(哈哈！邊個佢？)

(姓徐既人掛)

(聽講係仔都吸女嫁啦)

(所以我咪話佢唔係啲咁既人囉)

(驚人威脅到你咩？)

(唔驚)

(咁你依家做咩黑面？)

(唔笑唔等於黑面)

突然間洛妍既電話又響起左：

「閔哥話你塊面燻到可以煎雞蛋·哈哈！」

(仆街！咁都睇得出？)

於是洛妍九秒九戴返好個口罩

(做咩姐你？)

(費時比人見到我黑面·比人問長問短)

洛妍就咁行去廁所條路途中·好死唔死兜口兜而撞到徐亦言·洛妍一個轉身射個三分波既姿勢避開左徐亦言·點知徐亦言預判左洛妍既預判軌跡·洛妍一拎轉個頭就見到佢跟住自己·即刻笑左出聲。

亦言主動行近洛妍：「煎完雞蛋未？」

洛妍笑到見牙唔見眼。

(我係呷醋丫！)

(呷醋你地會有工作既交流)

(但我點承認？)

(唔係我唔想承認·而係我冇身份之下呷·邊有得認？)

(冇身份呷既醋·好Q酸)

(不過就算酸都好·同你玩·係我返工最大既樂趣)

(我知你一定有方法氹返我笑)

(我都唔會黐得太過火因為氹人個個會好辛苦好劬)

(所以梁洛妍我笑返就算)

(邊捨得黐你咁耐)

(逗你玩的)

「喂！你今晚OT？」洛妍臨收工問亦言。

「諗緊。」

「冇丫·我一陣都冇野做·想問你夠唔夠膽放工去打機？」

(見在你朝早主動約我食早餐份上，禮尚往來呢下野我都識啲既)

(比你日對夜對下我囉，反正我都可能)

「一定係夠膽嫁啦！」

(收到你！)

「咁行啦！不過食咩好？」

「你中意啦，我就得人」

(我唔中意你話「就」其實，用得「就」姐係唔情願啦)

(不過都費時同你拗)

「喂其實你同佢點丫？」洛妍主動問起亦言同佢女朋友。

「嘈左」

「下」

(唉，既然都揀左、揀返、可唔可以珍惜下，畢竟係犧牲左我啲)

(懶得理你地我專心諗食咩好過)

「我想食pizza!我最中意既食物黎！」

「好」

如是者食完飯，洛妍同亦言去左掃街，因為洛妍唔夠飽

(唔好意思，大胃女王是也！)

洛妍每行過一間鋪都有好多野想食，都停一停睇住menu或者玻璃櫃吞一吞口水

就係洛妍每次吞一下口水，亦言就行左出去比錢買比洛妍食：小丸子、雪糕雞蛋仔、豆腐花、朱古力蛋糕

亦言一接到食物就好順手投餵洛妍，成個過程好自然

(你終於肯對我好啦)

(一直以來既堅持好似有少少回報？)

(我好想時間就停係呢一刻)

(直到呢一刻我都仲等緊可以拖住手去掃街)

(可惜)

(不過咁都夠啦！好心足啦你梁洛妍)

(嗯嗯，但今日唔想同你客氣啦！比我借多你幾個鐘啦好唔好？)

洛妍繼續保持傻下傻下既作風，包括食野唔理儀態食到成個嘴都污糟晒、溶左既雪糕滴晒條件衫到、食小丸子辣親條俐呢啲基本野。

洛妍倒啲雞蛋仔落口個時唔記得左杯底有溶左既雪糕，所以一野倒左落自己個身到直到亦言一抬頭見到既洛妍第一個反應係企定、扁嘴、懊惱叫。

(仆街佢會唔會覺得我好麻煩好kick好論盡？)

(我都唔想嫁嗚嗚)

(我依家成身都係啦死啦，會唔會比人嫌棄蠢？)

只見亦言又一副「真拿你沒有辦法」既樣子，默默咁拎紙巾幫洛妍抹頭髮同手：「係咪呢，論盡妹」

(嘻嘻好野！有人照顧返我轉頭，真好)

「我仲想繼續食丫」

「下？你仲食得落？」

「嗯嗯！」

「你刷新左我對你胃容量既理解！」

(同你一齊，特別好胃口！)

(起碼食多一樣野就有多一次投餵，值回票價！)

洛妍記返起大學同學話過有一個為食既女朋友其實好幸福，因為為食女朋友好易氹，黐個下只要買佢中意既野食，佢即刻就會唔黐。

(我開始理解)

(佢見到我食野開心笑，佢都會跟住開心笑)

(不過我開心享受緊既其實唔係食物，而同徐亦言一齊既時光、比佢照顧下既時光、比佢見住我可愛為食既時光)

(老天爺，我好耐都有笑得咁開心啦，你比我笑多一陣啦好唔好，我以後會乖乖嫁啦)

(唔知佢點諗呢？)

(同我一齊既時光，佢係咪都同我一樣咁開心？)

終於去左平時去開既網吧，洛妍好熟手咁開電腦同埋禁主頁。

(你地唔會想我到底黎左呢到幾多次，學左幾耐)

(不過今日係黎補習既，哈哈！)

亦言開始同洛妍詳盡解釋每個制點用，分析作戰技巧等等洛妍感覺亦言可以出一本書教人。

(嘩，打個機姐，你洗唔洗咁有心得)

「係時候實踐下啦洛妍姐姐」

「OK!睇我表演！跟上我既速度喔」洛妍挑眉奸笑。

途中洛妍有嘗試用亦言學過既技巧，雖然都係死傷慘重，但起碼死得冇咁快。

「進步左啲洛妍姐姐」

「我有用心記住你既教導嫁」

「啊！」洛妍一時分心就比人秒左激動到佢又拍keyboard

亦言見到呢個情景只係係到笑：「睇住你玩原來開心過自己玩，拍keyboard 好可愛」

「哼！你唔撩我講野我一定唔洗死！」

「哈哈！」

「唔得！覆桌！」

結果下一鋪因為有徐老師既加持下，終於迎來勝利局。

洛妍想拎轉面讚亦言既時候，咁啱亦言又望向後面

洛妍個嘴差啲就錫左落亦言塊面到。

(太近啦)

洛妍感覺到自己面上染上兩片緋紅，正在失神之際，亦言突然捧起左洛妍塊面：「你好叻丫！」

洛妍報以一笑。

「我好想睇下你會唔會有打贏我既一日」

「我努力下囉努力『家暴』你」

兩人大笑左，然後拎袋離場搭車。

因為亦言聽日仲要返工，所以洛妍送左佢去搭車先，仲陪佢等埋架小巴黎。

係佢上車前一步，洛妍踭腳，輕輕錫左亦言塊面一下就走左。

(羞死人了！)

(想知企我地後面個乘客有咩感受)

(呼好彩着左高踭鞋，踭高都錫到佢塊面)

(徐亦言，個一晚我真係好開心)

(夠唔夠膽，以後都)

第三十一章、多疑症

洛妍第二日返工既時候係茶水間撞到輝爺，輝爺同個個都好熟，因為佢係呢到係比較健談，洛妍返工頭一個星期都係得輝爺主動撩佢傾計，之後先識到亦言。

「喂小朋友，早晨」

「？」洛妍黑人問號，下意識笑左一下。

「冇丫，叫下你姐，唔中意我咁叫你？」

「唔係丫，我幾中意丫，因為我會覺得我好似仲好有童真咁，雖然我真係細過你好多咁，所以你叫又幾合理，哈哈」

「喂但你呢排肥左啲」

「嗚嗚我依家咪減囉！」
(梗係啦，投餵係有代價嫁)

(再加上之前因為某啲人而唔開心，想用酒精麻醉下自己，個時既我唔係晚晚醉就係隔日醉)

(但我同自己講左要戒酒)

(因為我醉到講左啲唔應該講既野、醉到比人抽水)

(我個晚知唔應該再飲落去)

(同埋酒精好肥)

(輝爺之前提過話亦言中意瘦妹啲)

(咁咪咁囉)

(減肥至上！)

「喂，夠唔夠膽同叔叔去掃街」

「唔好大我，洛妍唔輸得」

「你咁講我放心晒！收工去食小丸子」

「你請係咪？」

「一定啦呢啲，知你愁緊錢叔叔怕你食唔飽」

「多謝輝爺」

其實早前洛妍同輝爺傾過下最近心煩既事（係除左徐亦言既）

「洛妍你做咩最近又OT返，你個樣好奷，你已經返兩份工啦喎」

「唉我都唔想嫁我愁緊錢」

「話比叔叔知發生咩事」

「係咁既，我最近身邊啲同學仔個個都好愁錢，有個自己冇時間返工但倒貼錢去book場比我地學會跳舞，有個為錢走去做酒吧PR，有個屋企有事學費都差啲交唔到，我又幫唔到佢地啲咩，我又唔係有十幾廿萬，我屋企人仲等緊我交家用，仲要我依家讀跳舞既錢都係由自己供緊，都未計我遲啲學會要貼錢搞表演，一個表演原來要比十幾萬，包括要租一個大會堂、背景佈景費、音效野、宣傳單張、請老師黎教舞排舞，樣樣都係錢」

「明白」

「最慘係我地之前搞既活動冇咩人參加，變相賺唔到錢，咪要我地倒貼囉我係叫有穩定收入既人啦，但佢地唔係佢地只係學生」

「好善良喎你都」

「有咩用？都係無能為力」

「但都有辦法嫁喎」

「所以幫唔到佢地既我咪唯有請下佢地食嘢咁囉，都係細錢姐，上次去玩都係我比大數既」

「其實叔叔我擔心你都唔夠錢洗喎」

「冇事既，所以我每日都返工囉，幾奷都返，放工去跳舞跳到周身骨痛都捱住痛堅持第二朝返工老實講我體力每日都透支緊」

「嘩，你比自己休息下啦」

「你知我唔中意放假」

「唔中意同有需要，兩樣野黎」

「」

「叔叔請你食飯啦」

洛妍感動到眼濕濕但循例都講左句唔好意思既，但輝爺堅持

「多謝輝爺」

「客咩氣你真係覺得唔好意思就當我係多謝你陪我一齊食嘢。」

(人間有愛係咪咁解)

(識到你地呢班同事，係洛妍既福氣、福份)

(我知你知我愁錢所以先會成日借啲意叫我陪你食野，實質係想請我食，為左減輕我既壓力)

(事關我係輝爺面前試過好多次行過見到想食既野但望左好耐都唔買)

(佢問起點解，我先開口話覺得太貴，自己唔捨得，雖然一開始會用減肥做藉口)

(但佢都會話：叔叔有錢，嗱我買左先，但我一定食唔晒既藉口而買)

(啲野食拎到我面前仲減咩肥丫大佬)

(笑死)

(我諗係得你先會知我過得苦)

「喂，有單野我都心煩緊」

「咩事丫輝爺？」

「我有個好好好好耐冇見既舊同事舊朋友返黎香港，約埋成班人去partyroom，但我好湊，唔敢自己去」

「有咩好湊？」

「我唔知你有冇曾經試過，去見一個好耐冇見既朋友，個種心情好緊張」

「啊我試過！我明」

「夠唔夠膽陪叔叔去？」

「哦你想我陪你，咁佢就算應酬其他人，你都有咁尷尬？」

「冇錯！」

「我明丫！但我都唔識佢哋，佢哋會唔會覺得好奇怪？」

「下，冇野嫁，因為全場我都係只係識得一個人，所以更加湊！」

「下？咁你又去既？識得一個，我以為你全班都識！」

「唔係，佢好多年前去咗外國住，已經好多年冇再聯絡，今次佢一返嚟，其實就係一次過約晒以前嘅同事同中學同學，所以有兩邊人都係唔識對方」

「哦原來係咁」

「不過佢都歡迎我帶個同事去一齊玩」

「咁」

「你放心啦，全部黎既都係大姐姐！」

「現在你成日都請我食嘢嘅份上我就陪你啦！不過我唔識得佢哋，所以可能我一去到都只會坐喺度食食食」

「冇問題啦！」

「仲好啦！我好耐冇BBQ啦，又慳一餐！好野！」

「哈哈！洛妍你好搞笑，係咪有得食都會約到你？」

「有人請就應該係，哈哈！」

如是者，輝爺都成日請洛妍食野，時不時會話洛妍好搞笑好得意。

「你真係好得意喎洛妍」

「係咩？雖然我唔get你地話得意位係邊」

「我終於明白點解丫言對你咁死唔斷氣！」

「下？哈哈！」

(斷左啦，人地咪揀左囉)

「好彩丫叔幾廿歲」

「定力夠丫嘛！知你想講咩啦我！」

「其實如果佢個時冇復合咪幾好囉咪冇事囉」

(試下唔好再提？)

(我每次一諗到呢到我都好崩潰)

(怨佢咁揀好定係怨自己太遲識佢好)

(我成日跟你出嚟食食食，都係為左想逃避現實、逃避問題)

(同埋我想逃離有佢既世界)

(點解？)

(逃離到咩？)

係洛妍失神之際，輝爺就拎個電話出黎影底洛妍啲表情、為食樣

「你咪繼續影影影、錄錄錄囉」

「你唔係話唔知自己打耳位係邊咩？」

「係丫」

「唔影唔錄你點睇得返自己打耳位係邊？」

「有道理啫！」

「嗱呢張！係咪打耳？」

「又係啫」

(笑到好似松鼠狗狗咁，腰果眼、包包面，個鼻都好打耳，整體好似有啲人話會比101分)

「喂，唔好睇相先啦，食左先啦，個雪糕溶啦」

「係係係！」

翌日，亦言放假所以洛妍同丫迪、輝爺佢地一齊食飯，等緊放飯之際，輝爺主動提起：「喂小朋友，琴日好多人ig問我關於你啲野？問你係邊個」

「？佢地識我既？」

「冇丫佢地睇到我story」

「下？你post左我？」

「係丫」

「下！你唔問下我先既？」

(仆街，咁徐亦言咪又會)

(又呷硬啦)

(今翅仆街了！)

「下？點解呢？條片我嫁嘛」

「又係喎」

(好似真係有啲道理)

(但我點解覺得怪怪地既)

(我一時之間都唔知點反駁你)

(唯有)

「咁萬一你放左我樣衰既片同相點算」

「我cut左唔樣衰個part啦 (幫你) 」

「 」

「咁一係我del返啦」

「有咩用？人地都睇到晒啦」

(有咩用？佢都睇到晒啦)

「 」

「下次唔好啦」

(唔怪得之徐亦言唔show我呢咁多日)

(好唔好晏啲打比佢解釋下？)

(但佢唔係你男朋友喎，你咁做其實都冇做錯野，做咩要驚佢髒？)

(我唔知丫)

(你知既)

(問下佢有冇髒先啦都係)

如是者，小鏡收左工之後懷住戰戰兢兢既心打電話比鏡鏡

「喂？你你冇野丫嘛？」

「冇野丫做咩？」

「冇丫我覺得你好似有啲出奇？」

(出奇地安靜)

電話另一端傳黎鍵盤聲

「我有野丫」

「咁我可能諗多左啦唔阻你打機啦」

「嗯」

(真係冇野?)

(我知真係冇野!)

(點解?)

(因為之前佢試過坦白同我講有唔開心)

(咁佢今次應該都係坦白對我既)

(我多疑了嗎?)

(又話男人好簡單，冇野就話冇野，冇野就話冇野既)

(女人先會有野話冇野嫁嘛)

(多疑症候群，點拆?)

(唯有誠實方為良藥)